


淵鑑類函

卷四十四之卷四十六



淵鑑類函卷四十四

帝王部五

帝王總載

帝王總載八

論其文

秦王餘傳其文

其文其文其文

論原魏王粲難鍾荀太平論曰聖莫盛於堯而洪水方

割丹朱淫虐四族凶佞矣帝舜因之而三苗叛戾矣禹

又因而防風為戮矣此三聖古之所大稱也繼踵相承

且二百年而刑罰未嘗一世而乏也然則此三聖能平

三聖能平則何世能致之乎孔子稱曰唯上智與下愚

不移不移者丹朱四凶三苗之謂也當紂之世殷罔不

小大好草竊姦宄周公遷殷頑民於洛邑其下愚之人

必有之矣周公之於三聖不能踰也三聖有所不化矣有所不移矣周公之不能化殷之頑民所可知也苟不可移必或犯罪罪而弗刑是失所也犯而刑之刑不可錯矣孟軻有言盡信書不如無書有大而言之者刑錯之屬也豈億兆之民歷數十年而無一人犯罪一物失所哉謂之無者盡信書之謂也因曹同六代論曰昔者夏殷周歷世數十而秦二世而亡何則三代之君與天下共其民故天下同其憂秦王獨制其民故傾危而莫救先王知獨治之不能久也故與人共治之知獨守之不能固也故與人共守之兼親疎而兩用參同異而並

進是以輕重足以相鎮親疎足以相衛兼并路塞逆節不生及其衰也桓文率禮苞茅不貢齊師伐楚宋不城周晉戮其宰王綱弛而復張諸侯傲而復肅二霸之後浸以陵遲吳楚憑江負固方城雖心希九鼎而畏迫宗姬姦情散於胸懷逆謀消於脣吻斯豈非信重親戚任用賢能枝葉碩茂本根賴之至於王赧降為庶人猶枝幹相持得居虛位海內無主四十餘年秦據勢勝之地騁譎詐之術征伐關東蠶食九國至於始皇乃定天位曠日若彼用力若此非深根固蒂不拔之道乎漢祖奮三尺之劔騁烏合之衆五年之中而成帝業自開闢已

來其興功立勲未有若漢之易者也夫伐深根者難為
功摧枯朽者易為力理勢然也漢鑒秦之失封植子弟
及諸呂擅權圖危劉氏而天下所以不傾動百姓所以
不易心者徒以東牟朱虛受命於內齊代吳楚作衛於
外向使高祖踵亡秦之法忽先王之制則天下再傳非
劉氏有也大魏之興觀五代之存亡而不用其長策觀
前車之傾覆而不改其轍跡子弟王空虛之地君亡使
民之失宗室竄於閭閻不聞邦國之政權均匹夫勢齊
凡庶內無深根不拔之固外無盤石宗盟之助非所以
安社稷為萬世之業也

增宋蘇轍夏論曰聖人之道

苟可安天下不求為異也堯舜傳之賢而禹傳之子後
世以為禹無聖人而傳之而後授之其子孫此以好異
期聖人也夫聖人之於天下不從其所安而為之而求
異夫天下之木何其用心之淺耶昔者湯有伊尹武王
有周公而周公又武王之弟也湯之太甲武之成王皆
可以為天下而湯不以予其臣武王不以予其弟誠以
為子之才不至於亂天下者則無事乎授之他人而以
為異也而天下之人何獨疑夫禹哉天下之人不能皆
賢而有異人焉為異而震之則天下皆將喜其名而失
其真故夫堯舜之傳賢者是不得已而然也使堯之丹

朱舜之商均僅可以守天下而堯肯傳之舜舜肯傳之禹以爲異而疑天下哉然則禹之不以天下授益非以益爲不足受也使天下復有禹子知禹之不以天下授之矣何者啓足以爲天下故也啓爲天下而益爲之佐是益不失爲伊尹周公其功猶可以及天下也聖人之不喜異也如此又蘇轍商論曰商之有天下者三十世而周之世三十有七商之既衰而復興者五王而周之既衰而復興者宣王一人而已夫商之多賢君宜若其世之過於周周之賢君不如商之多而其次於商者乃數百歲其故何也蓋周公之治天下務以文章繁縟之

禮和柔馴擾剛強之民故其道本於尊尊而親親貴老而慈幼使民之父子相愛兄弟相悅以無犯上難制之氣行其至柔之道以揉天下之戾心而去其剛毅果敢之志故其享天下至久而諸侯內侵京師不振卒於廢爲至弱之國何者優柔和易可以爲久而不可以爲疆也若夫商人之所以爲天下者不可復見矣嘗試求之詩書詩之寬緩而和柔書之委曲而繁重者舉皆周也而商人之詩駿發而嚴厲其書簡潔而明肅以爲商人之風俗蓋在乎此矣夫惟天下有剛強不屈之俗也故其後世有以自振於衰微然至其敗也一散而不可復

止蓋物之彊者易以折而柔忍者可以久存柔者可以久存而常困於不勝彊者易以折而其末也乃不可以有所立此商之所以不長而周之所以不振也原魏高貴鄉公少康漢高祖論曰土間荀顛等曰有夏既衰后相殄減少康收輯夏衆復禹之績高祖拔起虜畝芟夷秦項考其功德誰宜爲先顛等曰造之與因難易不同少康功德雖美猶爲中興與漢世祖同流可也至如高祖臣等以爲優上曰少康生於滅亡之後降爲諸侯之隸能布其德而兆有其謀卒滅過伐復禹之績祀夏配天不失舊物非至德弘仁豈濟斯勲漢祖因土崩之

勢收一時之權爲天子則數危其親爲人君則但除苛禁爲人父則不能衛子身歿之後社稷幾傾若與少康易地而處或未能復大禹之績也推此言之宜高夏康而下漢祖也後漢孔融周武王漢高祖論曰周武王從后稷以來至其身相承積五十世俱有魚鳥之瑞至高祖一身修德瑞遽有四呂公望形而薦女呂后見雲知其處白蛇分神母哭西入關五星聚又武王伐紂斬而刺之高祖入秦赦子嬰而遣之是寬裕又不如高祖也魏文帝周成漢昭論曰或方周成王於漢昭帝僉高成而下昭余以爲周成王體上聖之休氣稟賢妣之

賄誨周召爲保傅呂尚爲太師口能言則行人稱辭足
能履則相者導儀目厭威容之美耳飽仁義之聲所謂
沈漬元流而沐浴清風者矣猶有咎悔聆二叔之謗使
周公東遷皇天赫怒顯明厥咎猶啓諸金縢稽諸國史
然後乃悟不亮周公之聖德而信金縢之教言豈不暗
哉夫孝昭父非武王母非邑姜養惟蓋主相則桀光體
不承聖化不胎育保無仁孝之質佐無隆平之治所謂
生於深宮之中長於婦人之手然而德與性成行與體
并年在二七早智夙達發燕書之詐亮霍光之誠豈將
有啓金縢信國史而後乃悟哉使夫昭成均平而立易

世而化賢臣而治換樂而歌則漢不獨少周不獨多也
魏丁儀周成漢昭論曰成王昭帝俱以襁褓之幼託
於冢宰流言讒興此其艱險相似者也夫以發金縢然
後垂泣與計日力便覺詐書明之遲速既有差矣且叔
父兄子非相嫌之處異姓君臣非相信之地霍光懼人
謗而不出周公賴天變而得入推此數者齊本而論未
計重而况輕漢昭之優周成甚明者也成王秀而獲實
其美在終昭帝苗而未秀其得在始必不得已而論二
主余與夫始者增宋蘇洵六國論曰六國破滅非兵
不利戰不善弊在賂秦賂秦而力虧破滅之道也秦以

攻取之外小則獲邑大則得城較秦之所得與戰勝而得者其實百倍諸侯之所亡與戰敗而亡者其實亦百倍則秦之所大欲諸侯所大患固不在戰矣思厥先祖父暴霜露斬荆棘以有尺寸之地子孫視之不甚惜舉以予人如棄草芥今日割五城明日割十城然後得一夕安寢起視四境而秦兵又至矣古人云以地事秦猶抱薪救火薪不盡火不滅此言得之齊人未嘗賂秦終繼五國遷滅何哉與嬴而不助五國也五國既喪齊不免矣燕趙之君始有遠略能守其主義不賂秦是故燕雖小國而後亡斯用兵之效也至丹以荆卿爲計始速

禍焉趙嘗五戰於秦二敗而三勝後秦擊趙者再李牧連却之洎牧以讒誅邯鄲爲郡惜其用武而不終也且燕趙處秦革滅殆盡之際可謂智力孤危戰敗而亡誠不得已向使三國各愛其地齊人勿附於秦刺客不行良將猶在則勝負之數存亡之理當與秦相較或未易量嗚呼以賂秦之地封天下之謀臣以事秦之心禮天下之奇才并力西向則吾恐秦人食之不得下咽也蘇轍六國論曰嘗讀六國世家竊怪天下之諸侯以五倍之地十倍之衆發憤西向以攻山西千里之秦而不免於滅亡常爲之深思遠慮以爲必有可以自安之計

蓋未嘗不咎其當時之士慮患之疎而見利之淺且不
知天下之勢也夫秦之所與諸侯爭天下者不在齊楚
燕趙也而在韓魏之郊諸侯之所與秦爭天下者不在
齊楚燕趙也而在韓魏之野秦之有韓魏譬如人之有
腹心之疾也韓魏塞秦之衝而蔽山東之諸侯故夫天
下之所重者莫如韓魏也秦之用兵於燕趙秦之危事
也越韓過魏而攻人之國都燕趙拒之於前而韓魏乘
之於後此危道也而秦之攻燕趙未嘗有韓魏之憂則
韓魏之附秦故也夫韓魏諸侯之障而使秦人得出入
於其間此豈知天下之勢邪委區區之韓魏以當彊虎

狼之秦彼安得不折而入於秦哉韓魏折而入於秦然
後秦人得通其兵於東諸侯而使天下徧受其禍夫韓
魏不能獨當秦而天下之諸侯藉之以蔽其西故莫如
厚韓親魏以擯秦秦人不敢逾韓魏以窺齊楚燕趙之
國而齊楚燕趙之國因得以自完於其間矣以四無事
之國佐當寇之韓魏使韓魏無東顧之憂而為天下出
身以當秦兵以二國委秦而四國休息於內以陰助其
急若此可以應夫無窮彼秦者將何為哉原漢賈誼
過秦論曰秦孝公據崤函之固擁雍州之地君臣固守
以窺周室有席卷天下包舉宇內囊括四海之意并吞

八荒之心當是時也商君佐之內立法度務耕織修守
戰之具外連衡而鬪諸侯諸侯恐懼會盟而謀弱秦不
愛珍器重寶肥饒之地以致天下之士合縱締交相與
爲一當此之時齊有孟嘗趙有平原楚有春申魏有信
陵此四君者皆明智而忠信寬厚而愛人尊賢重士約
縱離橫兼韓魏燕楚宋衛中山之衆嘗以什倍之地百
萬之師仰關而攻秦秦人開關延敵九國之師遁逃而
不敢進秦無亡矢遺鏃之費天下諸侯已困矣及至秦
始皇奮六世之餘烈振長策而御宇內吞二周而亡諸
侯履至尊而制六合執敲朴以鞭笞天下威振四海南

取百越之地以爲桂林象郡百越之君俛首係頸委命
下吏乃使蒙恬北築長城而守藩籬却匈奴七百餘里
胡人不敢南下而牧馬士不敢彎弓而報怨然後踐華
爲城因河爲池據億丈之城臨不測之谿以爲固良將
勁弩守要害之處信臣精卒陳利兵而誰何天下已定
始皇自以爲關中之固金城千里子孫帝王萬世之業
也始皇旣沒餘威振於殊俗然而陳涉瓮牖繩樞之子
眊隸之人而遷徙之徒也材能不及中人率罷散之卒
將數百之衆轉而攻秦山東豪俊蜂起而亡秦族矣而
成敗異變功業相反試使山東之國與陳涉度長絜大

比權量力則不可同年而語矣然秦以區區之地致萬
乘之權招八州而朝同列百有餘年矣然後以六合爲
家嶠函爲宮一夫作難而七廟隕身死人手爲天下笑
者何也仁義不施而攻守之勢異也魏曹植漢二祖
優劣論曰客有問余曰夫漢二帝高祖光武俱爲受命
撥亂之君此時事之難易論其人之優劣孰者爲先余
應之曰昔漢之初興高祖因暴秦而起遂誅強楚光有
天下功齊湯武業流後嗣誠帝王之元勳人君之盛事
也然而名不繼德行不純道身沒之後崩亡之際果令
凶婦肆醜酷之心嬖妾被人豕之刑亡趙幽囚禍殃骨

肉諸呂專權社稷幾移凡此諸事豈非高祖寡計淺慮
以致然彼之雄才大略倣儻之節信當世至豪健壯傑
士也又其臬將畫臣皆古今之鮮有歷世之希覩彼能
任其才而用之聽其言而察之故兼天下有帝位流巨
勳而遺元功也世祖體乾靈之休德稟貞和之純精通
黃中之妙理韜亞聖之懿才其爲德也聰達而多識仁
智而明恕重慎而周密樂施而愛人值陽九無妄之世
遭炎光厄會之運殷爾雷發赫赫神舉用武略以攘暴
興義兵以掃殘神光前驅威風先逝軍未出於南京莽
已斃於西都夫其盪滌凶穢勦除醜類若順迅風而縱

烈火曬白日而掃朝雲也爾乃廟勝而後動衆計定而後行師故攻無不陷之壘戰無奔北之卒是以羣下欣欣歸心聖德宣仁以和衆邁德以來遠故實融聞聲而影附馮援一見而歎息股肱有濟濟之美元首有穆穆之容敦睦九族有唐虞之稱高尚純朴有羲皇之素謙虛納下有吐握之勞留心庶事有日昃之勤乃規弘迹而造皇極創帝道而立德基是以計功而業殊比隆則事異旌德則靡愆言行則無穢量力則勢微論輔則力劣卒能握乾圖之休徵應五百之顯期立不刊之遐迹建不朽之元功金石播其休烈詩書載其勲懿故曰光

武其優也

增

宋曾肇漢文帝論曰予嘗謂治天下本

於躬化而觀漢文帝躬行節儉以德化民宜其有以振起衰俗而賈誼以謂殘賊公行莫之禁止其說以背本趨末者爲天下大殘淫侈之俗爲天下之大賊則當時風俗可謂敝矣豈所謂躬化者果無益於治哉蓋文帝雖有仁心仁聞而不修先王之政故也先王有不忍人之心則有不忍人之政而其政必本於理財理財之法其定民之大方有四而任民之職有九士農工商以辨其名九穀草木山澤鳥獸材賄絲泉聚斂轉移以辨其職又爲之屋粟里布夫家之征以待其不勤是故天下

無遷徙之業無游惰之民其於生財可謂衆矣至於愛
養萬物必以其道故罽羅網罟斧斤弓矢皆以時入而
覆巢麇卵殺胎伐天皆爲之禁取之又有其時也於是
制禮以節其用天子都千里之畿諸侯各專百里之國
卿士大夫至於庶人莫不有田而視其位之貴賤稱其
入之厚薄而爲之法制度數以待其冠婚賓客死喪祭
祀之用者隆殺多寡各適其宜爲上者謹名分以示天
下而人人安於力分之內無覬覦於其外是以淫僻放
侈之心不生而貧富均一海內充實無不足之患然後
示之以廉恥興之以德義故民從之也輕方此之時游

惰者無所容而雖有僭侈之心亦安所施於外哉教化
之所以行殘賊之所以熄蓋出於是也自秦滅先王之
籍而漢因之務爲一切之制由天子至於庶人無復有
度量分界之限而人人去本趨末爭於僭侈高祖嘗禁
賈人不得曳絲乘車其令卒於不行至文帝之時商賈
富厚力過吏執而末技游食害農者蕃庶人牆屋飾文
繡僕妾之衣皆宗廟之奉天子之服則其俗之不善可
知矣而文帝不知修先王之政以救其敝方其開籍田
以勸耕者衣弋綈而斥文繡以示敦朴爲天下先其意
美矣然法度之具不行而欲以區區之一身率四海之

衆豈非難哉孟子曰徒善不足以爲政非虛言也雖然以彼之德成之以先王之政則庶幾三代之賢主哉唐王勃三國論曰漢自順桓之間國統屢絕奸回竊位閹宦滿朝士之蹈忠義履冰霜者居顯列則陷犯忤之誅伏閭巷則嬰黨錮之戮當是時也天下之君子埽地將盡雖九伊周十稷契不能振已絕之綱舉土崩之勢明矣向令何進納公業之言而不追董卓淮汜棄文和之策而不報王允則東京焚如之禍關右亂麻之屍何由而興哉至使乘輿蒙塵於河上天子露宿於曹陽蓋由何公之不明賈詡之言過也於是劉岱喬瑁張超孔

由之徒舉義兵而天下響應英雄騁其驍悍運其謀能海內囂然於茲大亂矣袁本初據四州之地南向爭衡劉景升擁十萬之師坐觀成敗區區公路欲居列郡之尊瑣瑣伯珪謂保易京之業瓚旣窘斃術亦憂終譚尚離心琮琦失守其故何哉有大賢而不能用覩長策而不能施便謂力濟九區智周萬物天下可指麾而定宇宙可大呼而致也嗚呼悲夫余觀三國之君咸能推誠樂士忍垢藏疾從善如不及聞諫如轉規其割裂山河鼎足而王宜哉孫仲謀承父兄之餘事委瑜肅之良圖泣周泰之瘼請呂蒙之命用能南開交趾驅五嶺之卒

東界海隅兼百越之衆地方五千里帶甲數十萬若令
登不早卒休以永年神器不移於暴酷則彭蠡衡陽未
可圖也以先主之寬仁得衆張飛關羽萬人之敵諸葛
孔明管樂之儔左提右挈以取天下庶幾有濟矣然而
喪師失律敗不旋踵奔波謙瓚之間羈旅袁曹之手豈
拙於用武將遇非常敵乎然備數困敗而意不折終能
大啓西土者其惟雅量最優乎武侯既歿劉禪舉而棄
之乃知德之不修棧道靈關不足恃也魏武用兵騁
孫吳臨敵制奇鮮有喪敗振威烈而清中夏挾天子以
令諸侯信超然之雄傑矣而弊於褊刻失於猜詐孔融

荀彧終罹其災孝先季珪卒不能免愚知操之不能懷
柔巴蜀砥定東南必然之理也文帝富於春秋先膺禪
讓臨朝恭儉博覽墳籍文質彬彬庶幾君子者矣不能
恢崇萬代之業利建七百之基骨肉齊於匹夫衡樞委
乎他姓遠求珠翠廢禮諒闇之中近抱辛毗取笑婦人
之口明帝嗣位繼以奢淫征夫困於兵革人力殫於臺
榭高貴鄉公明決有餘而深沉不足其雄才大略經緯
遠圖求之數君并無取焉山陽公之墳土未乾陳留王
之賓館已啓天之報施何其速哉下朱敬則魏武帝論
曰皇漢失圖網漏讒慝賊臣承間搖蕩宸居於是九州

幅裂四海橫流釋位勤王天下雲集曹公明銳權略神
變不窮兵折而意不衰在危而聽不惑臨事決機舉無
遺悔近古以來未之有也雖復名微衆寡地小力窮官
渡受圍濮陽戰屈然天下精明之士拓落之材趨若百
川之宗巨海遊塵之集高微故有荀彧郭嘉邢顛程昱
賈詡朱雲等或斂風長感或一見盡懷然後覽英雄之
心騁熊羆之勇挾天子以崇大順扶幼主而顯至公旌
賁忠良芟夷叛逆神道輔德百姓與能武公赫然霸業
成矣救弊即可仁則未知荀文若首預經綸提挈草昧
清神昭乎物表妙識出乎機先造我魏邦繫其是賴

言不吝五毒將施無詞寄文空器見志可不劇哉加以
孔文舉與道翱翔盡忠漢室崔季珪天骨高爽志在扶
傾豈大盜之所安也嗚呼欲盜之子見錦而不見人弭
謗之君尤人而不尤已豈知羣鷗不下衆雀遙驚者乎
昔周武之澤及昆蟲不能感食薇之士漢高之功濟草
木未能屈歌芝之賢猶且遂其孤貞容其怨讟况功未
半古德異樂推遭神器之流離問寶鼎之輕重欲使庶
人不議寧可得乎楊德祖才雖清秀志非遠圖託事行
誅死非其罪司馬懿雄才大度勇而有謀審其狼顧知
而不剪故知忌小怨而忘遠圖料目前而忽身後豈所

謂旁求哲人俾輔後嗣者哉或問曰天厭漢德海內分崩三雄鼎立俱受眷命乃至控御豪傑削平區宇英圖遠算何者為先君子曰孫仲謀藉父兄之資負江海之固未敢爭盟土國競鹿中原自守末餘何足言也蜀先主抱英濟之器無角逐之材遠竄荆蠻畏曹公神武奄有庸蜀乘劉璋之政衰國小人夷風頽俗陋山川險澀異嶠函之奧區江漢通流殊河洛之朝市豈得抗衡中夏齊足當途乎且夫度德而處量力而行劉備豈薄先王之舊居輕齊魯之故俗若泰伯之適吳越孔子之入九夷哉蓋不得已也是知才雄者地廣國大者兵強地

既由才才寧可易也宋蘇軾魏武帝論曰魏武長於料事而不長於料人是故有所重發而喪其功有所輕為而至於敗劉備有蓋世之才而無應卒之機方其新破劉璋蜀人未附一日而四五驚斬之不能禁釋此時不取而其後遂至於不敢加兵者終其身孫權勇而有謀此不可以聲勢恐喝取也魏武不用中原之長而與之爭於舟楫之間一日一夜行三百里以爭利犯此二敗以攻孫權是以喪師於赤壁以成吳之強且夫劉備可以急取而不可以緩圖方其危疑之間卷甲而趨之雖兵法之所忌可以得志孫權者可以計取而不可以

勢破也而欲以荊州新附之卒乘勝而取之彼非不知其難特欲僥倖於權之不敢抗也此用之於新造之蜀乃可以逞故夫魏武重發於劉備而喪其功輕爲於孫權而至於敗此不亦長於料事而不長於料人之過歟

精原晉陸機辨亡論曰昔漢氏失御姦臣竊命禍基京畿毒徧宇內皇綱弛紊王室遂卑於是羣雄蜂駭義兵四合吳武烈皇帝慷慨下國電發荆南權略紛紜忠勇伯世威稜則夷羿震盪兵交則醜虜授馘遂埽清宗祊蒸裡皇祖於時雲興之將帶州廳起之師跨邑雖兵以義合同盟戮力然皆包藏禍心阻兵怙亂或師無謀律

喪威稔寇忠規武節未有如此其著者也武烈既沒長沙桓王逸才命世弱冠秀發招攬遺老與之述業神兵東驅奮寡犯衆攻無堅城之將戰無交鋒之虜誅叛柔服而江外底定飭法修師則威德翕赫將北伐諸華誅鉏于紀旋皇輿於夷庚反帝座乎紫闥挾天子以令諸侯清天步而歸舊物戎車旣次羣凶側目大業未就中世而殞用集我大皇帝以奇蹤襲於逸軌睿心因乎令圖從政咨於故寔播憲稽乎遺風而加以篤固申之以節儉疇咨俊茂好謀善斷束帛旅於丘園旌命交乎塗巷故豪彥尋聲而響臻志士希光而景鶩異人輻輳

洪鏡卷之四十四
猛士如林謀無遺諍舉無失策故遂割據山川跨制荆
吳而與天下爭衡矣故魏人請好漢氏乞盟遂躋天號
鼎峙而立於是講八代之禮蒐三皇之樂告類上帝拱
揖羣后虎臣毅卒循江而守長棘勁鍛望颺而奮庶尹
盡規於上四民展業於下化協殊裔風衍遐圻乃俾一
介行人撫巡外域巨象逸駿擾於外閑明珠瑋寶耀於
內府珍瑰重迹而至奇玩應響而赴輜軒騁於南荒衝
朝息於朔野齊民免于戈之患戎馬無晨服之虞而帝
業固矣爰及末葉羣公既喪然後黔首有瓦解之志皇
家有土崩之釁曆命應化而徵王師躡運而發卒散於

陳民奔於邑城池無藩籬之固山川無溝阜之勢軍未
浹辰而社稷夷矣雖忠臣發憤烈士死節將奚救哉夫
曹劉之將非一世所選向時之師無曩日之衆戰守之
道抑有前符險阻之利俄然未改而成敗貿理古今詭
趣何哉彼此之化殊授任之才異也又辨亡論下曰
昔三方之士魏人據中夏漢氏有岷益吳制荆揚而掩
交廣曹氏雖功濟諸華虐亦深矣其民怨矣劉公因險
飭智功力薄矣其俗陋矣夫吳桓王基之以武太祖成
之以德聰明睿達懿度深遠矣其求賢如弗及恤民如
稚子接士盡盛德之容親仁罄丹府之愛拔呂蒙於戎

行擢潘濬於係虜推誠信士不恤人之我欺量能授器
不患權之我逼地方幾萬里帶甲將百萬其野沃其民
練其器利其財豐東負滄海西阻險塞長江制其區宇
峻山帶其封域國家之利未有巨弘於茲者矣借使中
才守之以道善人御之有術敦率遺典勤民謹政循定
策守常險則可以長世永年未有危亡之患易曰湯武
革命順乎天太元曰亂不極則治不形言帝王之因天
時也古人有言曰天時不如地利易曰王侯設險以守
其國言爲國之恃險也又曰地利不如人和在德不在
險言守險之由人也吳之興也參而有焉孫卿所謂合

其參者也及其亡也恃險而已又孫卿所謂捨其參者
也夫四川之崩非無衆也大江之南非乏俊也山川之
險易守也勁利之器易用也先政之策易循也功不興
而禍邁何哉所以用之者失也故先王達經國之長規
審存亡之至數謙已以安百姓敦惠以致人和寬沖以
誇俊乂之謀慈和以結士民之愛是以其安也則黎元
與之同慶及其危也則兆庶與之共患安與衆同慶則
其危不可得也危與下共患則其難不足恤也夫然故
能保其社稷而固其土宇麥秀無悲殷之思黍離無愍
周之感矣量于寶晉紀總論曰史臣曰昔高祖宣皇帝

以雄才碩量應運而仕值魏太祖創基之初籌畫軍國
嘉謀屢中遂服輿軫驅馳三世性深奧有如城府而能
寬綽以容納行任數以御物而知人善採拔故賢愚咸
懷小大畢力爾乃取鄧艾於農隙引周泰於行役委以
文武各善其事故能西擒孟達東舉公孫淵內夷曹爽
外襲王陵神略獨斷征伐四克維御羣后大權在已屢
拒諸葛亮節制之兵而東支吳人輔車之勢軍旅屢動
邊鄙無虧於是百姓與能大象始構矣世宗承基太祖
繼業元豐亂內欽誕寇外潛謀雖密而在機必兆淮浦
再擾而許洛不震咸黜異圖用光前列然後推轂鍾鄧

長驅庸蜀三關電掃劉禪入臣天符人事於是信矣始
當非常之禮終受備物之錫名器崇於周公權制嚴於
伊尹至於世祖遂享皇極正位居體重言慎法仁以厚
下儉以足用和而不弛寬而能斷故民詠惟新四海悅
勸矣聿修祖宗之志思輯戰國之苦腹心不同公卿異
議而獨納羊祜之策至於咸寧之末遂排羣議而仗王
杜之決汎舟三峽介馬桂陽役不二時江湖來同掩唐
虞之舊域班正朔於八荒太康之中天下書同文車同
軌牛馬被野餘糧棲畝行旅草舍外閭不閉雖太平未
洽亦百代一時矣二十餘年而河洛為墟戎羯擅制二

帝失尊山陵無所何哉樹立失權託付非才四維不張而苟且之政多也夫天下者大器也器大者不可以小道治勢重者不可以爭競擾古先哲王知其然也是以扞其大患而不有其功禦其大災而不尸其利是以感而應之悅而歸之如晨風之鬱北林魚龍之趨淵澤也然後設禮文以理之斷刑罰以威之故衆悅其教而安其俗君子勤禮小人盡力廉恥篤於家閭邪僻銷於胸懷又况可奮臂大呼聚之以干紀作亂之事乎加之朝寡醇德之士鄉乏不二之老風俗淫僻趣向失所學者以莊老爲宗而黜六經談者以虛薄爲辨而賤名檢當

官者以望空爲高而笑勤恪劉頌屢言治道傳咸每糾邪正皆謂之俗吏若夫文王日昃不暇食仲山甫夙夜匪懈者蓋共嗤黜以爲灰塵而相詬病矣由是毀譽亂於善惡之實情慝奔於貨欲之塗選者爲人擇官官者爲身擇利其婦女莊櫛織紵皆取成於婢僕未嘗知女功絲枲之業中饋酒食之事也故皆不恥淫佚之過不拘妒忌之惡有殺戮妾媵有黷亂上下父兄不之罪天下莫之非又况責之聞四教於古修真順於今以輔佐君子者哉禮法刑政於此大壞如室之斯構而去其鑿契如水斯積而決其隄防如火斯畜而離其薪燎也國

之將亡本必先顛其此之謂乎增唐太宗晉書宣帝
論曰夫天下之大黎元為本邦國之貴元首為先治亂
無常興亡有運是故五帝之上居萬乘以為憂三王以
來處其憂而為樂競智力爭名利大小相吞強弱相襲
逮乎魏室三方鼎峙干戈不息氛霧交飛宣皇以天挺
之姿應期佐命文以纘治武以陵威用人如在己求賢
若不及情深阻而莫測性寬綽而能容和光同塵與時
舒卷戢鱗潛翼思屬風雲飾忠於己詐之心延安於將
危之命觀其雄略內斷英猷外決殄公孫於百日滅孟
達於盈旬自以兵動若神謀無再計矣既而擁眾西舉

與諸葛相持抑其甲兵本無鬪志遺以巾幗方發憤心
杖節當關雄圖頓屈請戰于里詐欲示威且秦蜀之人
勇懦非敵夷險之路勞逸不同以此爭功其利可見而
反閉軍固壘莫敢爭鋒生怯寔而未前死疑虛而猶遁
良將之道失在斯乎文帝之世輔翼權重許昌同蕭何
之委崇華甚霍光之寄當謂竭誠盡節伊傅可齊及明
帝將終棟梁是屬受遺二主佐命三朝既承忍死之託
曾無殉主之報天子在外內起甲兵陵土未乾遽相誅
戮貞臣之體寧若此乎夫經討之策豈東智而西愚輔
佐之心何前忠而後亂故晉明掩面恥欺偽以成功石

勒肆言笑姦回以定業古人有云積善三年知之者少
為惡一日聞於天下可不謂然乎雖隱過於當年終見
嗤於後世亦猶竊鐘掩耳以眾人為不聞銳意盜金以
市中為莫覩故知順理而舉易為力背時而動難為功
况以未成之晉基逼有餘之魏祚雖復道格區宇德被
蒼生而天未啓時寶位猶阻非可以知競不可以力爭
雖則慶流後昆而身終於北面矣原晉平寶晉武革
命論曰史臣曰帝王之興必俟天命苟有代謝非人事
也文質異時興建不同故古之有天下者柏皇栗陸以
前為而不有應而不求執大象也鴻荒世及以養民也

堯舜內禪體文德也漢魏外禪順大名也湯武革命應
天人也高光爭伐定功業也各因其運而得天下隨時
之義大矣哉古者敬其事則命以始今帝王受命而用
其終豈人事乎其天意乎唐太宗晉武帝論曰武皇
承基誕應天命握圖御寓敷化弘道是以佚道代勞以
治易亂絕縑綸之貢去雕琢之飾制奢俗以變儉約止
澆風而反淳朴雅好直言留心採擢劉毅裴楷以質直
而見容嵇紹許奇雖仇讐而不棄仁以御物寬而得眾
宏略大度有帝王之量焉於時民和俗靜家給民足聿
修武用思啓封疆決神算於深衷斷雄圖於議表馬隆

西伐王濬南征師不延時獯虜削跡兵無血刃揚越為墟通近代之不通服前王之不服禎祥顯應風教肅清天地之功成矣霸王之業大矣雖登封之禮讓而不為驕泰之心因斯以起見土地之廣謂萬葉而無虞視天下之安謂千年而永治不知處廣以思狹則廣可長存居治而忘危則治無常治加之建立非所委寄失才志欲就於升平行先迎於禍亂是猶將適越者指沙漠而遵途欲登山者涉舟航而覓路所趣逾遠所向轉難南北倍殊高下相反求其至也不亦難乎况以新習易動之基而無久安難拔之慮故賈充兇豎懷奸志而擁權

楊駿豺狼包禍心以專輔遂至宮車晚出諒闇未周藩翰變親以成疎連兵竟滅其本棟梁迴忠而起偽擁衆各舉其威曾未數年綱紀大亂以至海內版蕩宗廟播遷帝道王猷反居文身之俗神州赤縣翻成被髮之鄉棄所大以資人掩其小而自託為天下笑其故何哉良由失慎於前所以貽患於後且知子者賢父知臣者明君子不肖則家亡臣不忠則國亂亂國不可以安也亡家不可以全也是以君子防其始聖人閑其端而世祖惑荀勗之奸謀迷王渾之偽策心屢移於衆口事不定於已圖元海當除而不除卒令擾亂區夏惠帝可廢而

不廢終使傾覆洪基夫全一人者德之輕拯天下者功之重棄一子者忍之小安社稷者孝之大况乎資二世而成業延三孽以喪之所謂取輕德而捨重功畏小忍而忘大孝聖賢之道豈若斯乎雖則善始於初而鮮令終於末所以殷勤史策不能無慷慨焉增唐朱敬則宋武帝論曰蓋聖人不能為時亦不能失時歷觀帝王之作未有不因人墜塗炭而得志或天下嗷嗷新主之資也是知秦有閻趙之陳漢罹莽卓之災晉由曹氏之專宋實桓元之篡始得奮其智力救此倒懸陳浞羿之辜問滔天之罪况劉裕天錫神勇雄略命世雷動四方

風發竹里龍驤虎步獨決神襟長劔南呼義聲四合摧虐楚已成之業復遺晉久絕之基祀夏配天不失舊物雖古人用兵不足加也至乃網羅俊異待物知人動必應時役無再舉西盡庸蜀北劃大河自漢末三分東晉拓境未能至也增盧思道北齊興亡論曰或問主人曰往者魏人失御六合雲擾河朔關右剪為二國永熙西遁天平北巡兩朝先主分陝而霸龍戰虎爭多歷歲祀既而水運值竭天祿永終齊室比迹於唐虞周人踵武於漢魏齊有五帝周易四王並纒踰二紀相繼而滅若其元首膺期股肱命世立極補天之業銘常勒鼎之功

至於暴君南面孽臣作輔民怨神怒國殄祀絕易世之
由雖傳之者舊載於史策通人雅旨其詳可得聞乎主
人應之曰吾少仕齊朝晚歸周室近世治亂粵可略陳
在魏正光牝雞司旦爾朱榮乘釁內曩滔天泯夏餘燼
跋扈延禍王城海內生民若崩厥角齊高祖天縱英明
之略神挺雄武之才龍摠豹變投袂而起四明昆弟大
會韓陵類蚩尤風雨之兵若新都犀象之陳彼曲我直
天實贊之日未移晷大殲醜族然後拔立宗枝入纂皇
統羣后成務天下晏如但芒刺成災震逼為梗遷鼎舊
鄴國命惟新朝章國憲燦然畢舉渭南失律似烏林之

喪師洛北先鳴同官渡之凱入雖天命有歸而盡於北
面方之魏武具體而微文襄嗣業始踰弱冠瓌傑之氣
足稱負荷賓禮時秀驅駕羣雄內外肅清朝無秕政侯
景背恩棄義狼顧汝穎蕭衍失信幸災蟻聚彭汴於是
謀臣運策猛士推鋒渦陽之役兗渠匹馬南逝寒山之
戰吳卒隻輪不反王思政入據長安淹歷歲時神旗暫
臨如風掃箠三秦勅敵閉關自守五湖之長革音請命
魏孝靜以天歷有在鼎祚將遺大禮備物率由舊典允
恭克讓推而弗居禍生非慮七首竊發爾其夷凶剪暴
剛斷英峙天崩地坼堂構闕如嗣子幼沖未堪多難文

宣雖云外弟少乏令名人望所歸便見推奉於時政有
彝倫朝多俊又爪牙皆韓白之伍心腹盡良平之儔外
靜方隅內康庶績主之不才四海弗之覺也洎乎受終
文祖燎天改物兵強地廣國富刑清發號施令必師古
始信賞必罰有如四時年穀屢登災害不作敵人竄迹
郊境無虞天保受命迄於五祀黃初泰始不能遠尚爰
及中年誕縱昏德賴有尚書令弘農楊遵彥魏太傅津
之子也含章秀出希世偉人風鑑俊朗體局貞固學無
不縱才靡不通裴樂謝其清言應劉媿其藻麗每乘輿
四巡恒守京邑凡有善政皆遵彥之為朝野貴賤至於

今稱之儲君繼體纔歷數旬近習預權小人並進楊公
慮有危機引身移疾幼主若喪股肱固相敦勉乾明之
始難起戚藩變成倏忽殞於殿省詩云人之云亡邦國
殄悴君子是以知齊祚之不昌也孝昭地乃密親位居
元輔有姬公之戚無復子之心亦由主弱時艱慮深家
國當陽正位事出權道兼以天保之後懲其淫縱不邇
聲色不事晏遊孝於太后篤於昆季慎惜名器愛養黎
元後庭嬪嬙皆是藩邸之舊數不盈十竟無私寵特解
吏事尤好禮容但政尚苛碎暗於聽受降年不永暮歲
而崩武成母弟之親入主宗祏而少稟凶德不孝不仁

龍攢在殞淚不承臉有和士開者爰自黃門漸至端右
盡景娛侍略不休停恩寵勢望燠灼朝野甲第當衢侔
擬公室富商大賈朝夕盈門筐篚苞苴煙聚波屬河清
之末長彗爲災太史奏言須有禳救武成便自稱太上
傳位後主胡長榮以從舅之親馮子琮以姨夫之戚俱
受寄託並當樞要或性識庸近或意懷險薄皆不學無
術智能淺短及天統末年武成即世和士開一相處內
自擬伊周趙郡王叡明德茂親聰爽俊悟藩王之內時
望隆重以士開凶醜宜加屏黜入踐青蒲讜言規諫而
少主聰察不類成昭母后才明異於馬鄧遂使密戚賢

王絞縊以戮雖遐邇胥怨愚智同憤而依托城社末如
之何司徒瑯琊王儼年甫十四兼領憲司憤其所爲切
齒忿咤執送南臺異其身首京師市里儻蹈成羣梁董
之慶不足斯比自茲已後政道彌昏高阿那以牧圉之
勤重其佞媚韓長鸞以講紕之能悅其趨走陸子駱提
婆者出於阜隸本是鞞工愚暗庸短僅辯菽麥與韓高
之徒共持國柄窮極富貴轉日迴天其反道違常速亡
趨滅事非一緒不可勝陳周武大捷平陽乘虛徐入將
有降心士無鬪志前世耿賈之雄俛首頓顙先朝貔虎
之銳屏氣重足舉晉陽如拾芥攻鄴宮猶振槁萬里百

城交臂屈膝南極江淮北盡砂塞西界函谷東至滄溟
府帑粟帛之饒兵革士民之衆齊之所畜盡爲周有不
亦哀哉非朱敬則北齊高祖論曰昔張讓段珪濁亂天
下漢召董卓將顯其誅竟有小平之奔曹氏因之乃創
霸業鄭儼徐紇點辱皇猷魏收爾朱榮欲洗濯宮掖遂
至河陰之禍齊人藉此用承明命故曰亂者理之源機
者命之兆不可失也神武崖岸高竦器宇深沉望之儼
然風塵自遠聽之愈厲雷霆或聞因天下之心覽英雄
之議以普泰元年六月建旗於信都以討爾朱兆爲名
當時趙魏之豪盡其死力蓋代之傑共其奔走然後數

亂常之罪顯安忍之辜發義帝之喪三軍縞素承淮汜
之逼萬里同心莫不精勇感人神雄略出天地檄詞未
草聲已振於賊庭王誅欲加命乃懸於鬼錄旣而龍驤
虎步高下在心開幕府以臨外藩分腹心而統京邑雖
生我者父母立我者高王旣懷震逼之威易爲芒刺之
說周鄭交惡衍殖構氣趙鞅畏讒遂起晉陽之甲襄王
失據乃有居汜之悲雖表數相仍公怒未怠紫宸不可
久曠丹穴難以更燠遂應飛來之謠乃議遷都之便關
西河北剪爲寇讐天平永熙便成敵國於是疆場大駭
鉦鼓相聞邛山之師杖馬捶而自免砂苑之役跨驃駝

以遁歸勝負相叅波瀾不定豐功厚利各有可觀者焉
若乃推誠與人懷舊不捨擇子如之蝨看尉景之肱喻
高昂於肝胆委侯景於半體此明達也牽馬麥田不飲
社酒此嚴斷也放李穆之歸使其富貴感虎兕之對以
勸事君此宏量也故能廢立雖多不失臣節兵鋒屢折
人望攸存即與夫嬖賈充忌荀或不同時也盧思道
後周論曰周太祖幼而機警智數過人屬魏多故召募
關隴值二將相屠三軍未一見推為主遂握兵符俄而
魏武西巡奉迎車駕扶天子以會諸侯萬世一時也撫
養荒餘鳩聚兵甲同心之旅不滿萬人齊神武以大兵

數十萬將清灞漭雷動雲移萃於渭曲太祖以數千弊
卒振旅而還遂基王業竇泰以勁兵深入一戰喪元高
敖曹以銳氣先登臨陳授首兵革歲動敗鮮勝多高氏
雖怙其衆力莫敢先至及蕭氏將亡邊服震擾荆郢內
附庸蜀來王器械完整貨財充實帶甲百萬驍將如林
晏駕之辰國與齊人相埒矣朱敬則梁武帝論曰梁
高祖聰明文思寬厚通博生而神異動多奇怪此天表
也永元之初羣賢受命竭懷輔正盡力康衢細陳未開
纖塵不動而雄圖英算孤識獨見審長河之將決知崑
山之必焚理欲先天未遑後舉叫嘯龍虎合集風雲馳

兩函以取荊州連五營以震都邑長流遠邁獨決方寸
霜風飛掃雲雨露沐白旄一麾頑童投首乃弔冤魂而
謝牛酒昭筐篚而軾善人師不疲勞人無怨讟謳歌是
逼獄訟攸歸代德立成眷命斯在然躬覽載籍備睹興
亡留心求瘼勵精納善雖化未大道時亦小康也若尋
其德音討其風俗尚根淺易拔源涸難流禍亂相仍蓋
其宜矣昔魏太祖兵鋒無敵神機獨行百姓與能天下
慕德猶且翼戴弱主尊獎漢室降及宋高剪平僞孽安
復王家義聲薄天高誠動日然更懸兵四嶽決勝五湖
北靜燕塵西清秦霧宏勳不讓盛德見推備物滿庭猶

非所望故晉帝今日之所事本所甘心義士猶或非之
通人尚為薄德况梁取天下又甚於斯南康主盟實稱
齊帝奉之以成大順承之而動義兵國步既寧家怨又
雪君稱主祭臣復何猜尋其錫文考其謙讓事同對面
理非飾詞寧知悠悠江山相去千里矯情僞迹頓至於
斯欲令節義行於比屋其可得乎夫君人者日月齊其
明陰陽資其信江海同其量天地偕其容未有飾智驚
愚銜材惑衆每事皆欲先人所唱復須稱贊浮華道長
輕薄路開以天譴為嘉祥用妖怪為休祉聚斂俱極賞
罰無章有識為之寒心羣寮曾不先覺利器不藏奸夫

得志然侯景之兵我也仗我器也豈異術哉由上之失教也帝子王孫跨州連郡未有晉鄭齊心牟虛合契五侯九伯列海分山罕聞申包胥之頓哭秦庭茅夷鴻之幣謁吳國戶口徒衆不覩死戰之人寵遇雖多寧有報恩之士長洲杜若一旦凋零稽山竹箭忽然摧折可不慎歟或問曰梁王不以黃屋爲尊紫宸爲貴離欲絕愛遣色歸空有湯武之憂勞若堯舜之懼腊享國五十若登春臺忽爲羈旅叛臣鳴吠逋醜長戟指闕強弩臨城兵折意窮忿毒而沒善不可恃岐路何歸君子曰武帝暮年荒誕實甚殫守縣之力不充自縱之資盡丁口

之租纔足緇衣之費昔夏桀以九州之富秦皇以六合之尊造瓊室而天下土崩作阿房而寰中瓦解况地比一郡國乃三分外有征戍之勤內有雕靡之弊加以金利寶柱爛熳雲霞至於銀榜朱簾的歷星月神怒人怨禍積患生何足疑也林梁何元之梁典論曰歷究前書詳觀往行昭晰千載氛氳萬古考其寬猛知布政之善惡驗其黜陟識其主之是非以曩求今工拙可見齊季昏虐政由羣小朝宰被無辜之誅藩戚懼淫刑之害高祖痛兄弟之戮因天下之心舉荆雍之師興湯武之伐指揮則智勇風從號令則遐邇嚮應取郢郢若拉枯定

金陵如沃雪黃鉞既斬白旗乃懸師不疲勞民無怨讟
樂推斯在代德是膺逆取順治享年四紀萬幾事廣六
職務殷負宸君臨勤於聽覽兢兢罔倦乾乾不已加以
藝業之美莫以比倫洞曉儒元該羅內外舉洙泗之餘
教針其膏盲採周孔之遺文正其魚魯於是開廣庠序
敦勸後生執經者連袂負笈者排肩濟濟多士於斯爲
盛至若御民之術未爲得也夫根深者葉茂源遠者流
長是以擇沃壤以置王畿國都園於六鄉封城號於千
里其外則布之以五等列之以萬國分疆畫野立樹黨
閭境隴以懷其仁桑梓以安其俗諸侯守境土以事於

上天子執賞罰以臨於下有功則褒無道則廢二伯弼
於內朝九牧佐於外政間之以賢戚叅之以懿親弘仁
義於區中被禮樂於遐表忠信之禮達謙讓之風行然
後龜龍游於池沼鸞鳳棲於苑囿及其末世雖主昏於
上民亂於下猶晉鄭有依桓文是相絕而更續顛而必
扶數百年外方至於滅周道既沒斯風漸喪洎於後代
其弊尤甚罔恤民之不存而憂士之不祿莅民之長守
次更爲前人未安後人便及迎新送故疲於道塗高祖
博覽今古備觀興亡猶復躡其遺風襲其弊法澆薄逾
甚淆紊日滋梁氏之有國少漢之一郡大半之人並爲

部曲不耕而食不蠶而衣或事王侯或依將帥收縛無罪逼迫善人加以朝務內叢官方外曠有其位而無其職非其事而侵其官四海至殷機事輻輳人君雖敏有所不周人君雖明有所不照豈可專於親覽忘彼責成就此而言大失有二習守膠之弊棄更張之善屈子投江寧論其痛賈生慟哭豈踰斯悲自晉室東徙權寓江濱桓伐燕秦而不振劉克函洛而還亡至於宋齊疆場侵感高祖躡斯頽運有志吞并斯實王者之宏材有國之通準然六納魏主一入洛陽竟無所成得不補失民既勞止訖可小康昔勾踐之欲滅吳前為其政兵強國

富然後用之一舉而虜夫差再舉而霸中國高祖進不擇將退不教民雖慕古人安能有濟孫子曰善戰者前勝而後求戰善勝者前戰而後求勝明者出師必前料敵豈可暗茲人事幸彼天時哉且國有累卵之憂俗有土崩之勢開幸人之志兆亂臣之心遂使侯景被吾甲而尅王城驅我人而圍天闕勢如破竹易若轉圜萬里靡沸四方瓦解事非一夕其所由來漸矣世祖聰明特達才藝兼美詩筆之麗罕與為匹伎能之事無所不該極星象之功窮著龜之妙明筆法於馬室不媿鄭元辨雲物於魯臺無慚梓慎至於帷籌將略朝野所推遂乃

撥亂反正夷凶殄逆紐地維之已絕扶天柱之將傾黔首蒙拯溺之恩蒼生荷仁壽之惠微管之力民其戎乎鯨鯢既誅天下且定早應移鑾西楚旋駕東都禮祀宗祊清蹕宮闕西周岳陽之敗績信任宇文之和通以萬乘之尊居二境之上率土分崩莫知攸暨謀之不善乃至於斯敬皇世祖之裔允膺下武天不福善早世登遐土德代興火行告謝驃騎王琳懷申胥之志蘊荀息之忠爰納嗣君更紹顏運於是嘯命方岳大興師旅龍虎戰鬪水潰山崩君臣播越寄命齊土若乃萇弘興周而速咎王永復秦而延殃天欲亡之非人能救夫創天下

者至明者也喪天下者至暗者也是以禹湯與其功桀紂廢其業莫不得之者前主失之者後君逮茲梁室有異於此何則高祖撥亂除殘反身招於禍亂世祖復讐雪恥翻手命於寇讐敬皇繼祀而鼎移後嗣紹基而祚徒書曰皇天無親惟德是輔自天所祐歸於有德元之官自有梁備觀成敗昔因出軸流寓齊都窮愁著書竊慕虞子採其聞見撮其衆家一代之事可得觀矣唐朱敬則陳武帝論曰梁自侯景入寇蕭譽外奔西鄰責言南風不競是以大命集於有陳也武帝身長七尺垂手過膝蓋姚襄劉備之儔也惟寬以容物明以知人曠

蕩不羈雄勇蓋世聲振嶺表功濟日南屬王室不綱大
難未已江湖羣盜日尋戈戎是以投袂而呼夕不待旦
以梁大寶三年二月會王僧辨於白茅灣齊小白之合
諸侯以謀王室臧子源之要天地惟討賊臣故戮力盡
心有死無二義聲一發其從如雲盪徧地之橫流廓溥
天之巨浸鬱侯景於竹里執王偉於草間爰其息歸瞻
烏遂止仍以新不間舊疎不間親高讓近臣方求別統
昔魏推袁紹漢謝項王道貴能伸理不嫌屈及江陵不
守喪君有君疆場無虞郡臣輯睦足以據三曠之遺憤
歎萬國之夙悲既上宰變圖假立非次晉出子圍秦納

貞陽陵谷遷移對之長歎君臣易位但覺悲哉况乃居
汜不歸焉用方伯在鄭未納誰曰勤王於是潛謀腹心
陰召武旅囚杜陵於別室告文帝於臨時舟乘旦潮旗
寢夜月埽重氛於絳闕反宸極於紫微役不浹辰區宇
大定加以北挫蕭軌西拒王琳聖德日新元勳漸茂然
後繼宋齊之不業承舜禹之大名昇壇而告上元分珪
以揖羣后大哉美哉人無間焉但雲雷尚屯邊塵未輯
翌日告漸綴衣在庭楚之王孫歎布衣之未返燕之太
子踐機橋而不歸悲夫文原唐太宗隋高祖論曰夫帝
王受命非因衆人之所舉既乘便之取不同優劣之勢

各異或雄圖內斷英謀外決海納山容如覆如載磊磊落落真帝王者也只如文皇起自布衣臨馭四海欺孤兒以致天下奪寡婦而登神器復留心萬姓務從儉約自金陵滅後奢泰日滋起仁壽於五柞移新都於灊岸合浦珠機填於帑藏江南姬媛納於椒掖仁壽之役萬姓力殫雕琢之功中民竭產從渭至灊寧不爲勞移故就新理多其弊心隨地廣意逐時驕猜忌無端觸途多諱文母夷戮兒母被誅牝雞晨鳴皇枝勦絕廢長立少付託失人功臣良將誅夷備盡享年不永豈非天乎

增唐朱敬則隋高祖論曰昔孫資陰謀晉宣入輔鄭譯

矯制隋文受遺自此而有魏人從斯以遷周鼎蓋天厭亂德神誘其衷若妄指河冰遂成王業誤擊金鼓仍啓霸圖也况體貌奇特儀表絕人周太祖之欽明異其風骨齊憲王之聰察憚以非常韋鼎一見以委誠趙公聞名而進女屬周多世故禍難洊臻始以后父之尊遂受托孤之寄騎虎不下犄角是因不利孺子非唯管叔之言社稷輸人寧止休公之對所以尉遲舉魏從亂如雲王謙據蜀其徒若市遂能驅駕豪傑委任忠良不下廟堂天下大定然後謳歌允集文物滿庭卿雲曉聚長星夜掃拱揖而朝羣后昇壇而類上帝紹舜禹之遺躅光

漢魏之大名於是流曠蕩之元風浸淳古之膏澤削秋
荼之繁令革亡國之哀聲加之以恪勤廣之以質素太
陽滿昆蟲之穴湛露垂行葦之蒼教入七年亦可以即
戎矣俄屬陳朝喪德江海揚波自絕於天結怨於下乃
以開皇八年十月承少昊之秋氣動文昌之將星下蜀
漢之舟翩翩龍躍集幽并之騎蕭蕭馬鳴一葦而可以
橫大江三令而可以陵湯火蔣山苦戰子文之魂魄飛
揚建業大崩叔寶之金湯不守既遭岸上之虎非復水
中之龍斬伯豎以謝陳人禮陸機而慰吳士春波暫洗
汙俗咸新秋露一零弊化斯改故使六合之中如觀曉

日八紘之內若遇新晴况復盡力於人厲精爲政躬親
以率下因心以感物煙火萬里風雨四時野有擊壤之
歌天無垂象之誠元菟丹徼煙燧不驚玉檻金河波瀾
久息天子登雲臺而訪道寔垂拱而無爲公卿指日觀
以推誠願升中而每竭可謂盡美矣未盡善也然天性
既猜素無學術意不及遠政惟目前是以牝雞司晨讒
人罔極剖符罕山河之誓同盟多翦黜之悲恩不終於
有功罰每深於無罪是以知隋運之不永矣君子曰昔
陸孟知中興之微宣帝始重儒術李通稱漢家之命世
祖專信讖文時好既行其流遂廣故子雲符命尹敏僞

言即其類也高祖少愛不經之談遂好迂誕之說所以
王韶順旨袁克取容賞溢丘山恩深江海豈不弊乎又
祥瑞者聖人之應也至若八百集於孟津六王至於陔
下周入岐山之北晉衆江漢之南負樂就陳攜手適宋
牛馬內向羣盜外奔宗社乂安黎民不散此瑞之上也
若乃連珠共軫的樂清漢之涯合璧齊輝光芒黃道之
上四時不爽百穀用成家有孝慈人懷禮義此善之應
也至如白鹿朱鴈瑤露卿雲鳩雀異毛草木殊狀此並
沐我皇澤煦我帝春聖人圓城之中天子生成之物豈
足表太平之日顯休明之辰而隋主好之意不能盡遂

令巧僞相半何其薄哉而楊夔創守論曰貞觀中文皇
帝聽政之暇問房魏以創業守文之難易房對以創業
魏對以守文蓋房以經綸之始備極勤劬所以見創業
之難矣魏以昇平之後率多懈怠所以見守文之難也
然創業之初雄豪未賓生民嗷嗷唯德是歸所以開基
之主皆垂勳而起覩覆車之轍焉肯更脩其軌哉當其
雲雷未亨天地猶蒙龍虎交馳煙塵晝昏故得一士則
前席以待問聞一言則傾耳而聳聽用人若不及從諫
若轉圜勇於得而疎於失冒履鋒鏑涉歷險危其取也
既勞其得也亦勤誠爲創業之難也及乾坤霧霽山河

有主四海之內罔不臣妾言而必從如影之附欲而必至如響之應愛之可以升九霄怒之可以擠九泉順意者駢肩逆耳者畏忌好惡之情不由其臧否賞罰之道匪關於功過下懼以求命衆怒而莫諫此所以爲守文之難也然則自漢而下有天下者孰不始則孜孜以親萬機將俟乎治及時旣平俗旣康以泰自逸怠於庶務者多矣且創業之主旣得之後猶墮夙志以壞大業而况求旣治之後即已安之朝其能納讜言任正人屈己以順民抑心以從下者不亦鮮乎魏文貞公守文之難豈初心盈中心是也總而論之療飢者易爲食其創業

乎醫疾者難爲藥其守文乎密明周如砥本朝立國規模綱目如何論曰立國其猶作室者其經營之始必相度方隅諏咨廣狹鳩工庀材絜短計長大匠者乃引繩持墨剏趾闢基卒之崇卑數隘舉不出範圍疆理之中此其規模也垣墉必固藩衛必嚴棟梁必擇而凡所以維持措置於其間者此其綱也若夫勤樸斲塗墍茨列棖桷通戶牖纖微曲折亦綢繆脩飾焉此其目也惟規模宏遠綱目具備斯可以稱巨麗矣立國之道何以異於是蓋自古英君誼辟創業垂統有一代之興必有一代之制惟其議法於初也至精至備故其貽謀於久也

不愆不忘即三代稱比隆矣而以成周爲獨盛焉亦以其規模綱目監夏殷而益之謨烈佑啓咸正罔缺使子孫千萬世守之雖至今存焉可也太祖天挺神智躬擐甲冑提尺劔逐羣雄得正統膺大寶經綸草昧講畫精詳而成祖興師靖難踐阼承乾運英睿之謀計靈長之策當其時名臣碩輔畢智殫忠相與考究贊襄於其下監歷代之流弊倣成周之遺規凡鈞極敷猷體國經野設官分職立綱陳紀所以著之章程頒之法制者二祖之立國固卓越百王範圍千載矣今載在祖訓會典諸令甲篆書方冊所陳科條至密固未易以更僕數也如

削平僭偽肅清華夏嚴明迪亂威懷並流至於鼎新以革其弊賁飾以釐其蠱者悉裁自淵衷出於獨斷如兩京並建形勝得矣十三省分列疆域理矣尊號未上而立宗社以定本也戎務方殷而設學校以崇文也改元三中書省而置六卿使政本有所歸去宋之樞密院而立五府使兵權有所統闡寺止給埽除之役后戚弗干政事之權五刑不得復用欽恤之仁也四夷不得輕伐窮黷之戒也南郊饗帝而一歲一舉足以通幽明之故初服紀元而一世一改足以正曆數之傳祀典舉而四瀆五岳之封號盡除經術明而諸子百家之偏駁無取

春宮之屬不設宦官杜巫蠱之禍也藩國之封不攝民事防淮齊之變也殷啓萌賢之篇昭臣度也存心省躬之錄示君範也卧碑監規之班正士習也資世教民之訓淑民行也別善惡則有大誥以示勸懲詰奸慝則有大明律令以權輕重諸司有職掌而內外大小之相屬稽古有定制而尊卑貴賤之相安此則舉其綱爾至若朝覲貢獻之儀章服品式之制爵祿等威之辨奢階侈踰之防兵食屯鹽之法征輸稅役之務至煩委也亦莫不變通盡利經理適宜統紀相維纖悉具舉豈不燦然明秩然備哉蓋二祖創之歷聖守之潤飾鴻猷昭垂燕

翼培植既固締造惟勤將使後之嗣基紹服者即委裘之存而亦可以享垂衣之休也今夫守三尺出一令於殿陛之間薄海內外朝發夕馳雷厲風颺無敢有攜心越志者威名靈爽侔乎造化而紀綱法守足以警服華夷固如此也譬之作室然雖公輸運巧班倕矢能其所範圍疆理之者既極其宏大而所以維持措置綢繆脩飾之者細微周折靡弗至焉固可以繫苞桑奠磐石也雖風雨之或侵扃鑰之偶失苟一葺整而緘固之又奚損於室之巨麗乎噫舊章俱在成憲可監也是在聖君賢相主持於上率作以省其成而已矣書曰有典有則

貽厥子孫丕顯丕承先於謨烈愚何幸躬逢其盛有隕
文原宋顏延之為湘州祭虞帝文曰惟哲化神繼天作
聖藏器漁陶致身愛敬是以二妃嬪德九子觀命在麓
不迷御衡以正唐歷既終虞道乃光咨堯授禹素俎采
堂百齡厭世萬里陟方敬詢故老欽咨聖君職奉西湘
虔屬南雲神之聽之匪酒伊葷增唐呂溫謁舜廟文
曰恭惟至仁無方大孝不匱德馨升聞允釐百揆以聖
授聖猶言歷試擇人之君良不可易聖功克贊相待而
宣雷驅四凶雲起八元火治陶土璿璣轉天垂衣巖廟
萬物浩然是稱至理是曰帝者混成雍熙永錫大嘏乃

眷南顧蒼梧之野歸堯鴻名付禹天下茫茫推遷邈萬
斯年三代之後誰為聖賢政如顏波俗若壞山韶樂猶
在薰風不還於戲道有通變事有同異官帝家王隨時
之義揖讓而禪固非力致所以識者存而不議若輔相
之宜則成之規煥乎文章百代可知九官惟舊七政有
彝弘道在人太平無時如何後王曾莫是思其易甚簡
舍而弗為歷山巋然河水東注唐虞日遠楊墨誰拒瞻
彼歷山薄言往訴庶幾精誠必我依據宋之問祭禹
廟文曰昔者巨浸橫流下民交喪惟后得流星貫昴之
夢受括地治水之符底定九州弼成五服遂類上帝乃

延羣公自有生靈樹之司牧大災莫踰於堯日勤人不
越於夏君向微隨山奠川之功蒼生爲魚至今二千九
百年矣肇爲父子始生君臣興用天之道廣分地之利
者嗚呼皆后之功也之間移班會府出佐計鄉遂得載
踐遺塵遠探名穴朝玉帛於斯地聲存而處亡留精靈
於此山至誠而響發先王爲心享是明德后之從政忌
此姦慝酌鏡水而勵清援竹箭而自直謁上帝之休祐
期下人之蘇息日之吉神之歆激楚舞奏越吟芳俎溢
醇壘深遺羞厭於魚鳥餘瀝醉於山林忽雲搖兮鳳舉
空壽堂兮陰陰

原陳沈炯祭漢武帝陵文曰臣聞喬

山雖掩鼎湖之靈可祠有魯遂荒大庭之跡不泯伏惟
陛下降德倚蘭纂靈豐谷漢道旣登神仙可望射之罍
於海浦禮日觀而稱功橫中流於汾河指柏梁而高宴
何其甚樂豈不然歟旣而運屬上僊道窮晏駕翠幕珠
簾一朝零落茂陵玉椀遂出人間陵雲故基與原田而
撫撫扶風餘跡帶陵阜而茫茫羈旅纓臣豈不落淚昔
者承明見罷嚴助東歸駟馬可乘長卿西返恭聞故實
竊有愚衷黍稷非馨敢望徼福爵臺之心空愴魏君雍
立之祠未光夏后瞻仰徽猷伏增悽懼

唐太宗祭魏
太祖文曰夫大德曰生資二儀以成化大寶曰位應五

運而遞昌貴賤廢興莫非天命故龍顏日角顯帝王之符電影虹光表乾坤之瑞不可以智競不可以力爭昔漢室豆分羣雄岳立夫民離政亂安之者哲人德喪時危定之者賢輔伊尹之臣殷室王道昏而復明霍光之佐漢朝皇綱否而還泰立忠履節爰在於斯帝以雄武之姿當艱難之運棟梁之任同乎曩時匡正之功異於往代觀沈溺而不拯視顛覆而不持乖徇國之情有無君之跡既而三分肇慶黃星之應久彰主卜啓期真人之運斯屬其天意也豈人事乎 **增**唐賈曾高祖受禪告南郊文曰伏以生人以來樹之司牧眷命所矚謂之

大寶曆數弗在罔或偷安故舜禹至公揖讓而興虞夏湯武兼濟干戈以定殷周事乃殊途功成一致後之創業咸取則焉臣恭承家慶世祿降及曰祖曰考累功累德賜履參墟建侯唐社地居戚里門號公宮丕緒隆基足爲榮矣但有隋爽德屬饜大業饑饉師旅民胥怨咨謫見咎徵昭於元鑒備聞卑聽所不忍言臣恭守晉陽馳心魏闕被首濡足拯溺救焚大舉義兵式寧區宇徵要荒之辮髮輯兆庶之離心誓以捐軀救茲人命指陳喪亂期之又安有功繼世無希九五惟身與子竭誠盡力率先鋒鏑誓以無貳載蒙弘誘克濟難艱電掃風驅

廓清天邑傳檄而定岷峨拱手而平關隴西戎即敘東夷底定非啓非贊孰能茲速尊位世嫡翊奉宗隋戮力輔政無戲臣節值鼎祚云革天祿告移謳歌獄訟聿來唐邸人符神瑞輻輳微躬遠近宅心華夷請命少帝知期運已去大命有適遜位而禪若隋之初讓德不嗣羣臣逼請今六宗之祀七政未齊罪有所歸恐當天譴請因吉日設壇告類祇畏上帝惠茲下民翼子謀孫罔敢愆德則小則大無惑無違對越鴻休伏深慙懼

淵鑑類函卷四十四

淵鑑類函卷四十五

帝王部六

帝王總裁

帝王總裁九

表

謚號

批答

章

讓禪勸進表原魏文帝讓授禪表曰臣聞堯禪重華舉其克諧之德舜受文命采其齊聖之美猶下咨四岳上觀璇璣今臣德非虞夏行非二后而承曆數之詔應選授之命內自揆撫無德以稱且許由匹夫猶拒帝位善卷布衣而逆虞詔臣雖鄙蔽敢忘守節 梁江淹齊高帝讓禪表曰陛下遠視唐虞永揖之典近摹漢魏高謝之禮既鑒金水昏明之數又協雲雷興替之徵若乃與

能之交禪錫之會豈伊虛薄所可遵擬昔傅巖佐商秩終上公磻谿翼周名極列伯臣才非半古功愧逮聖獄訟不往謳歌寧歸河乏馬圖之寶天無乘龍之錫伏願陛下遺舜禹之心俾臣守巢由之節則道曜日月澤浸飛泳魏辛毗等勸進表曰古先聖王所以授天命而不辭者誠急於答皇天之意副四海之望不得已也桓階等勸進表曰臣等以爲天命不可稽神器不可黷昔周武中流有白魚之應不待濟而大號以建舜受禪大麓桑陰未移而已陟帝位所以祇承天命者若此之速也故無固讓之義不以守節爲貴必信於神靈而符

合於天地也晉劉琨勸進元帝表曰否泰之運古今迭有宗子有明德曷常不由多難以隆中興故獫狁殘周以啓宣王巨猾竊漢乃發光武陛下天授至德聰明神武勞謙恭已卑以自牧體伯禽經營之誠行公且吐握之事上崇勤王之義下垂庇民之量收羅俊乂任賢以能綏爰陝東化流無外戎狄荒服請事率職重譯納貢不遠萬里功高德劭遐邇歸心况陛下道邁太宗勲莫與二且以親以賢義實兼之是以琨敢緣天文人事徵祥之應昧死上事以奉尊號願陛下無常心以羣心爲心忘其身以萬物爲公則宗廟蒸嘗不替於今逆虜

通寇一討而滅無負於天下無愧於七后矣又表曰
臣聞台宿在天實承辰極股肱雖卑同體元首臣負乘
前朝過充三吏國之崇替有與憂喜臣聞德合兩儀者
固以四海爲公智周萬物者不以一身爲私舜禹揖讓
以陟帝位湯武征伐以濟時難彼四王者邁會不同登
受有異至夫外已存物憂世遺躬其致一也期於愛民
治國應變合道以爲天下利而已矣况宗廟是陛下之
宗廟百姓是大晉之百姓耶陛下若忽七廟之重拒天
人之心絕而不繼困而不拯則宗廟不歆其禋祀羣生
無所措其手足矣况臣班具臣之列荷累世之恩上懷

國家之統俯絕烏鳥之情者哉昔伍員發怒手撻平王
之墓灌夫慷慨身塞吳淞之旗皆能宣其臣節據其私
忿戮尸斬將存亡罔恨臣誠無若人之才實有此人之
憤苟得上憑天威展其微効雖隕九泉猶以明白又
表曰陛下之躬執謙光允恭克讓俛從吏議示總萬機
布曠蕩之詔開自新之路海隅漸惠朔南暨聲有生之
倫咸備嘉慶陛下量包宇宙明侔三辰靈祗稽應華戎
同戴加以王室中微邦基將絕遺民元元屬命陛下陞
下以德則無所與讓言事則固所負荷誠宜遺小禮存
大務援據圖錄居正宸極上副祖宗之心下一兆庶之

望臣聞必也正名前聖大之春秋傳曰名以出信名苟不正則事有不從信苟不立則禮義或愆乃載籍之明誠開塞之所由也 又表曰臣聞天生蒸民樹之以君所以對越天地司牧黎元聖帝明王鑒其若此知天地不可以無饗故屈其身以奉之知黎元不可以無主故不得已而臨之社稷時難則戚藩定其傾郊廟或替則宗哲纂其祀所以弘振遐風式固萬世自元康以來艱禍繁興永嘉之際氛厲彌昏宸極失御登遐醜裔國家之危有如綴旒天不悔禍大災洊臻國未忘難寇害尋興逆胡劉曜縱逸西都主上幽劫復沈虜庭神器流離

再辱荒逆臣每覽史籍觀之前載厄運之極古今未有在食土之毛含氣之類莫不叩心絕氣行號巷哭况臣荷寵二世位廁鼎司承問震惶精爽飛越臣聞昏明迭用否泰相濟天命無改曆數有歸或多難以固邦國或隱憂以啓聖明是以齊有無知之禍而小白爲五伯之長晉有驪姬之難而重耳以主諸侯陛下元德通於神明聖姿合於兩儀應命世之期紹千載之運符瑞之表天人有徵中興之肇圖讖垂典自京畿殞喪九服崩離陛下撫寧江左奄有舊吳柔服以德伐叛以刑抗明威以攝不類仗大順以肅宇內純化旣敷則率土宅心義

風旣暢則遐方企踵昔少康之隆夏訓以爲美談宣王之興周詩以爲休詠况茂勲格於皇天清暉光於四海蒼生顛然莫不欣戴聲教所加願爲臣妾者哉且宣皇之胤唯有陛下億兆攸歸曾無與二天祚大晉必將有主主晉祀者非陛下而誰是以邇無異言遠無異望謳歌者無不吟咏徽猷獄訟者無不思於聖德天地之際旣交華裔之情允洽一角之獸連理之木以爲休徵者蓋有百數冠帶之倫要荒之衆不謀而同辭者動以萬計是以臣等敢考天地之心因函夏之趣味死上尊號願陛下存舜禹至公之情俠巢由矯抗之節以社稷爲

務不以小行爲先以黔首爲憂不以克讓爲事上以慰宗廟乃顧之懷下以釋普天傾首之望臣聞尊位不可久虛萬機不可久曠虛之一日則尊位以殆曠之浹辰則萬機以亂陛下雖欲逡巡其若宗廟何其若百姓何齊謝朓爲百官勸進齊明帝表曰臣聞時乘在御必待先天之業神化爲皇乃叶應期之運况復湯孫有緒纂堯惟德舊邦佇新復禹歸社大齊之權輿寶曆孕育前古昭假四海克酬三靈而嗣命疾威蕃鄙叛渙委裘御寓彝鼎如忽陛下文思體道徇齊作聖翦應龍於冀州戮長蛇於沮水榮光之瑞昭迴延喜之寶潤色天睭

爰發人謀咸贊伏願陛下仰答靈祇弘宣景命誕受多方奄宅萬國陳沈炯爲羣臣勸進梁元帝初表曰蠢爾羯胡遂憑天邑閭闔受白登之辱象魏致堯城之疑臣聞喪君有君春秋之茂典以德以長先王之通訓少康則收衆撫職祀夏所以配天平王則居正東遷宗周所以卜世漢光以能捕不道故景歷重昌中宗以不違羣議故江東可立天其祚梁必將有主軒轅得姓存者二人高祖五王代實居長功高九有道濟生民非奉聖明誰嗣下武日月貞明太陽不可以闕照天地貞觀乾道不可以久惕寶器存乎至重介石慎於易差黔首豈

可以少選無君宗社豈可以一日無主第二表曰紫宸曠位赤縣無主百靈聳動萬國迴遑雖醒醉相扶同歸景亳或謳且誦總赴唐郊陛下沈首謗然讓德不嗣臣聞星迴日薄擊雷鞭電者之謂天岳立川流吐霧蒸雲者之謂地包天地之混成洞陰陽之不測而以則成萬物者其在聖人乎故云天地之大德曰生聖人之大寶曰位黃屋廟堂之下大非獲已所安明鏡四衢之尊蓋由應物取訓陛下稽古文思英雄特達比以周旦則文王之子方之放勳則帝摯之季千年旦暮可不在斯庭闕湮亡鐘鼎淪覆嗣膺景業非陛下而誰豈可使赤

省更立盆子隗囂託置高廟陛下方復從容高讓用執
謙尊展其矯行偽書誕罔正朔見機而作斷可識矣不
疑何卜無待著龜日者公卿失馭禍纏霄極宗社不墜
繫在聖明今也何時而申帝啓之避凶危若此方陳太
伯之辭國有具臣誰敢奉詔此第三表曰日者百司岳
牧仰祈宸鑒以錫珪之功既歸有道當璧之禮允屬聖
明而優詔謙冲宵然凝貌謳歌載馳是用翹首楚人固
執熏丹穴以求君周民樂歸越岐山而事主漢王不即
位無以貴功臣光武止蕭王豈謂紹宗廟陛下英威茂
略雄圖武算指撝則丹浦不戰顧盼則陂泉自蕩地維

絕而重組天柱傾而更植縱陛下拂衣而遊廣成登弁
山而去東土羣臣安得仰訴萬物何所歸仁况郊祀配
天壘籙禮曠齋宮清廟匏竹不陳豈可久稽衆議有曠
彝典徐陵勸進梁元帝表曰臣聞封唐有聖還承帝
馨之家居代維賢終纂高皇之祚至如金行重作源出
東莞炎運猶昌枝分南頓莫不因時多難俱繼神宗者
也陛下握符執鉞將在御天玉勝珠衡先章元后神祇
所命非惟太室之祥圖書斯歸何止堯門之瑞星纏東
井時破嶠潼雷震南陽初平尋邑宗王啓霸非勞武德
之侯清蹕無虞何事長安之邸正應揚龍旂以饗帝御

鳳宸以承天歷數在躬疇與爲讓豈可逡巡固讓方示
石戶之農高謝君臨徒引箕山之客未知上德之不德
唯見聖人之不仁沈炯爲百官勸進陳武帝表曰臣
聞春榮秋落四時所以迭代金行水流五德所以互序
昔陶唐告終有虞氏作漢魏禪讓晉宋以之登庸夫有
非常之功有非常之賞能利天下者受天下之利陛下
造化之功日用之德褰裳去之物誰仰訴頃五星夜聚
八風通吹豐露呈甘卿雲舒簇白狼遠至素雉朝飛天
意顯然靈貺可觀增明成祖勸進表曰臣聞鉏奸去
惡式揚神聖之謨附翼攀鱗幸際風雲之會功光前列

德振中興恭惟殿下文武英明寬裕仁孝爲太祖之嫡
嗣實國家之長君天生不世之資民仰太平之主曩因
奸惡逞毒鞠兇禍旣覃於宗藩機欲傾於社稷集天下
之兵以相圍逼使國中之衆不能逃生乃赫怒而奮一
隅之師遂呼吸而定九州之衆戰必勝攻必取實由天
命之有歸近者悅遠者來爰見人心之有在今內難已
平之日正萬方忻戴之時宜登宸極之尊以慰臣民之
望臣等忝隨行陳仰仗威靈素無遠大之謀竊效分毫
之力雖不敢冀雲臺之圖像實欲慕竹帛之垂名又
諸王勸進表曰天眷皇明宏開景運宜正大寶永係萬

邦恭惟殿下龍鳳之姿天日之表禎祥昭應於圖書堯舜之德湯武之仁勲華已彰於宗社邇因儉邪構禍毒害宗親輒動干戈幾危社稷乃遵承祖訓奉行天誅以一怒而安斯民備文王禮義之勇不四載而固帝業同世祖中興之功武以翦戡克全皇考之天下文以經緯聿明洪武之典章實天命之所歸豈人力之能強願俯徇於衆志庶永紹於洪圖某等誼重天倫情深手足荷蒙拯溺得遂生全祇迓龍輿早正天位庶皇考之天下永有所託四海之赤子永有所歸幸鑒微忱毋煩謙讓登極表增唐柳宗元賀登極表曰臣聞天地泰而聖人

出雷雨解而品物榮是以五行迭用水火更其位十葉重光宗廟輔其德殷宗恭默再開成湯之業漢文聰明克承高祖之緒陛下重離出曜體乾繼統主鬯彰孝恭之美撫軍著神武之功欽承遺訓永保鴻業遏密之中施雨露以被物遐邇之地覩日月之繼明則四維之外八極之表人神胥悅草木皆春煦嫗生成不失覆載况臣謬膺守土累受國恩爰自出身洎乎領鎮沐浴聖澤優游昌時不獲覩闕庭之禮展臣庶之分戴天荷聖倍萬恒情入王超代李相賀登極表曰臣聞大明繼照雖昧者必昭其視霆雷發聲雖聵者必達其聰是以聖人

鼓萬物而耳目咸革感人心而天下太平致理興邦率
由茲道伏惟陛下紹累聖之鴻緒冠前王之盛烈祥符
薦委景福攸臻纂武繼文重光累洽自宣猷上嗣育德
儲闡仁孝表於域中慈儉彰於天下由是餒者思食瘠
者思豐習爽咸耀於光明枯朽更延於惠澤顛顛億兆
咸沐惟新鼓舞而四表歡心運行而二儀貞觀臣夙承
朝獎謬列藩條歡忭之誠倍萬恒品 宋真德秀賀登
極表曰炎正中興適際百年之盛真人繼作聿新萬寓
之瞻河海晏清璣衡明閏恭惟陛下天開睿哲神授奇
英朱邸宣猷已慰億兆人之望大橫應卜嗣承十三聖

之休祇通文謨仰承慈極紫宸南面時聆任姒之徽音
長樂東朝日致閔曾之德孝以副遺大投艱之託以昭
繼志述事之功臣述守价藩欣附景運班聯近侍莫陪
獸舞之廷身接遐眈共仰龍飛之造 陳闕撰
人名賀登極
表曰曆數承堯禪千歲皇圖之正謳歌歸舜煥一時帝
位之新廟社鼎安寰區泰定竊以百年南渡四世中興
繼體守文之功固永扶於基緒撥亂反正之略將侵復
於土疆人未占以有孚天不言而善應是生上聖以開
重明恭惟陛下性德靖淵幾神濬哲韜除外邸隱然天
日之姿出入內朝允矣宗祊之望共識五馬之渡誰知

六龍之潛迨此承祧決於與子合夷夏之無外慶帝王
之有真佇歌周宣復古之詩并擬元結齊天之頌含齒
之衆企足以須臣猥守京畿欣逢御極風雲從而萬物
覩已丕聳於八垠日月照而四時行幸光輝於三輔
元虞集賀登極表曰鴻業啓圖世守肇基之迹龍庭受
賀躬膺大曆之歸欣戴云初謳歌爲盛欽以世祖紹統
乾之運裕皇隆出震之名推一本之均齊累四朝之繼
及於惟景命監至德之無私粵在太宗御禎符而有慶
天心攸屬國勢以安欽惟陛下道協彌綸功存綏撫立
長式遵於家法計宜允協於輿情車服旌旗皆我祖宗

之舊星辰河嶽赫乎宇宙之新時開太平人用寧一臣
等叨承重任適際昌期建皇極以敷言親揚彝訓坐明
堂而布政永贊成能明李善長賀太祖登極表曰天
生聖智宏開基創業之功運際亨嘉仰濟世安民之主
萬方欣戴四海更新恭惟陛下稟聰明睿智之資備聖
神文武之德首出庶物卓冠羣倫初無尺地一人之階
而致溥天率土之會東征西怨猶大旱之望雲霓外攘
內安措顛連而置衽席兵威所向靡堅不摧德意所加
無遠不服平羣雄而僭亂息埽六合而煙塵清拯其塗
炭之氓布以寬仁之政四維張而風俗美三綱正而倫

理明天命攸歸實茂膺於曆數人心所屬咸鼓舞於謳歌冕旒端拱於宸居華夏統承於正朔乃繼天而立極爰定鼎而建都臣等幸際亨嘉獲叨任使忝居鵷列上祝鴻圖偃武脩文開太平於萬世制禮作樂妙化育於兩間先蘇伯衡賀登極表曰皇穹垂佑誕錫貞符哲后挺生丕承正統欽惟陛下匹馬渡江六龍御極大明建國八埏咸囿於昭臨洪武紀元九域同歸於戡定於昭駿烈有赫鴻猷臣等仰沐恩波叨居翰苑雲從龍風從虎幸逢千載之昌期河出圖洛出書願啓萬年之文運尊號表增唐李嶠賀加尊號表曰陛下俯順羣情懋膺

大典垂光休於百代被鴻私於萬族凡在含生孰不慶幸臣聞太朴旣謝旦昏之迹已殊聖道不追王霸之風且雜雖崇號廣溢遞享於尊名而德薄政衰不光於神器伏惟陛下承大雲之法紀應滎河之寶籙以天上天下之尊爲隆平太平之主不言而理三階正而六氣調不怒而威萬寓清而百蠻服延富壽於和平制雍熙於易簡懷恩慕化之黨候雨占風疇德瑞聖之符非煙若霧青襟詠歎於庠塾黃髮謳吟於衢路固可使堯舜擁篲禹湯扶轂豈登三咸五邁昔超今而已哉嘉號初登殊章備舉鋪帝容而建皇極大寶重光撫乾軸而正坤

維洪鑪再造仙渙與祥風俱動湛恩將洊雷並作緩姬
文之獄既削爰書錫漢后之醑且頒戎級滂流之澤出
九液而浸羣方抃躍之音自三川而周四海加以崇祇
肅於梵宇致嚴恭於清廟申寃舉滯而有善必甄享德
報功而無文咸秩規模粲而洋溢道德紛而布濩豈徒
朝野稱慶覩美化之維新故亦神祇降祥見鴻基之載
永臣叨延龜組謬分虎符千年有遇更逢開闢之初百
辟相歡不預趨馳之末瞻雲路而式忭仰天庭而載佇
踴躍之懷企聳無極白居易代宰相請上尊號表曰
臣等已陳表章請上尊號愚誠懇切聖鑒未回躋地跼

天不勝大願臣聞大道者無求於物物尊而不辭至公
者非欲其名名至而不讓不讓故與天合德不辭故率
土歸心斯所謂應乎天順乎人也伏惟陛下嗣興一德
統牧萬方致時俗於和平納生靈於福壽金革已偃銷
七十載之厲階玉燭方調啓一千年之聖運天人合應
書軌混同而鴻名未加盛典猶缺華夷失望史冊無光
此誠君上之謙然亦臣下之罪也今臣所以上啓天意
下酌人情再黷皇明重陳丹慊謹按書曰惟睿作聖又
曰乃聖乃神乃武乃文又經曰明王之以孝理天下凡
此五者歷觀列辟雖甚盛德莫能兼之伏以陛下自臨

大位及茲二年無中車汗馬之勞而坐平鎮冀無亡弓遺鏃之費而立定幽燕可不謂睿文乎削平天下震曜八荒北虜求婚以稟命西戎乞盟而納款威靈所及奔走來賓可不謂神武乎陛下以萬乘之尊四海之富供養長樂道光化成推而致之可塞天地可不謂孝德乎故臣等敢冒死稽首上尊號曰睿文神武孝德皇帝伏惟陛下略撝謙之小節弘祖宗之大猷惟十二聖在天豈忘繼其志以億兆人爲子寧忍阻其心特回宸衷俯受徽號在元功不爲主宰於盛德有所形容煥乎大哉垂裕無極此實天下之幸非獨臣之幸也而崔元翰請

德宗復尊號第一表曰臣竊觀前代之盛列辟之英咸保鴻名而崇明號或配其德或昭其功蓋所以揚耿光彰淳懿而示遠也其有暗然不耀後嗣何觀蔽而不揚羣臣之罪伏惟陛下由正統而臨阼承聖緒而受圖稟高明之姿於天侔博厚之德於地端教化之本制行禮之中聲震八區威加六合運造化之柄靡有不通成陰隲之功衆莫能測是用光膺聖神文武之號其後雖逢阨運尋睹昌期誠我武之掃清猶自咎而抑損同罪已之義明愛人之仁羣臣等上順聖心以成恭德退懷大懼謂掩全功五年於茲若墜冰谷方今百職皆理庶績

其疑人用咸和俗惟丕變陳師鞠旅無犯塞之虞封疆
畫界無專地之患四海寧謐萬類蕃滋薄刑溢不寃之
聲逋賦蒙勿收之惠西成有穰歲之報南極見壽星之
祥靈貺屢加天恩允答豈宜固爲菲薄以掩盛明尊號
之崇願復如舊又第三表曰臣等前再上表請加尊
號實以功德俱茂典禮宜崇然而不能鋪陳無以動寤
愚誠雖竭天鑒未回臣等謹按白虎通曰號者功之表
也神農有教田事之勤燧人有興火食之利伏羲正五
始祝融續三皇人爲之名以美其事其後帝王之盛洎
我祖宗之明咸因人心而慎古道雖損益或異其於表

功明德一也臣等所以遵有國之令典采上古之遺文
察人志於謳謠觀天意於符瑞敢以爲請累表陳誠曩
者運丁艱難時或順動陛下思成湯之罪已念周宣之
側身去徽號而不稱垂炯誠而自儆應天以德示人以
恭聞於蠻貊戎夷告於天地宗廟是故咸知陛下之志
慕義而歸仁潛感陛下之誠垂靈而助順今者君臣和
德上下叶心百職畢脩庶官以序法令明具教化流行
方內歡康天下寧壹四民遵業萬類樂生嘉應休徵神
物靈貺形於草木著於星辰而辭之以仁壽未臻至化
猶鬱遂使德誠可紀名號未崇不告於明神不示於殊

俗將何以知陛下之戡難將何以表陛下之致平下無以光於四方上無以報於九廟其不可一也淳古之至化邈而不追烈祖之盛儀廢而不續其不可二也庶正羣官宗室支屬西土耆老太學諸生黃冠之倫緇衣之侶萬衆伏闕彌旬織路而乃不從人心以違公議其不可三也守謙恭卑讓之志忽光大弘遠之圖臣等誠雖至愚以爲大謬伏以恒久之德貞夫一也元始之義善之長也并包覆露天之大也清淨元默道之妙也睿知之周物不可以不稱夫聖也妙算之無方不可以不稱夫神也行仁義脩典法歌詩頌考文章不可以不稱夫

文也攘却戎夷戡翦暴逆邊兵以整禁衛以嚴不可以不稱夫武也臣等謹稽以乾符叶於古典侔德澤之廣配功業之崇冒昧萬死伏請上尊號曰貞元大道聖神文武皇帝臣等竭其愚悃發於交感庶以回日其能動天又第五表曰臣等上援天地神靈次奉祖宗典法列經義而順古因人心以從時詞繁而不能陳明誠竭而未蒙察納德美盛而猶蔽憲度缺而莫脩罪戾是憂冰炭交集臣等伏讀詔書曰遐想哲王則自燧人神農殷湯之時有其事也又曰欽若典訓則自代宗肅宗元宗而上有其儀也又曰所誠者滿所尚者謙守之以誠

期於終始臣等以爲去鴻名而貶損謙之始也遵舊典而奉承謙之終也造次而未嘗違於禮守之以誠也敬恭而無或蹈於專所誠者滿也又曰虛美崇飾所不敢當伏惟陛下恤人之心動天之德致理之文教戡難之武功著於頌聲光於史氏上有其實無虛美之謙下盡其誠非崇飾之僞又曰勉一乃心共康庶政曩者公卿大夫侍御攜僕或從扞牧圉或備持戈矛蓋有同力之誠而無離德之間今者四嶽羣后九土庶邦外自藩維內及宗室黃髮耆老青衿諸儒或僉以同辭或遠而抗疏一心之效也羣材序進百職交脩烽燧不驚兵戎以

息鑽鑿不用獄訟以清六氣和而風雨時五穀昌而倉廩實庶政之康也誠由教化以致雍熙自當冠於皇王寧復謝於堯禹宜加明號以表成功陛下雖以爲辭臣等未知其說又伏奉詔旨令臣等斷表伏以君親一致臣子一例而春秋之義以王父命辭父命不以父命辭王父命則臣等得遵先帝之典以違陛下之詔又第六表曰臣等感謙沖於盛德而私有舊典隳廢之憂懼煩瀆於聖聽而內懷微誠懇迫之切進退競惕不知所措伏以事貴舉其中名惡浮於實得其中不宜變之而失正有其實不必避之以爲恭况以祖宗之矩儀國家

之典制陛下道尊教備德博化光奚取於貶損而自卑
朴略而太簡者也昔漢宣帝謂元帝曰我漢家自有制
度諸葛孔明誠其主曰不宜妄自菲薄前史載之詳矣
幸陛下思之臣等又爲執小讓之賢不足以方得禮合
度之善去鴻名之敬不足以補變法改作之專陛下行
之將何所守伏以高祖受茲明命歷代承以聖德至陛
下又有下武繼文重熙累盛之美不可謂德之不嗣也
躬上聖之資合至聖之化戡禍亂制夸狄之武脩禮樂
垂憲度之文不可謂實之不孚也比年以來俗化斯厚
人少犯法吏無舞文獄犴將空桎梏不用可謂人皆遷

善豈曰俗未勝殘若固辭之所未悟也况於尊號之美
陛下已受於初去之既由於艱虞復之宜因於康靖若
示其罰不旌其功何以知區宇之削平何以知宗廟之
紹復似乎陛下之本意但自欲改先祖之遺儀耳內外
臣庶跋履山川思報主恩誓雪讐恥亦欲據其宿憤表
其成勞陛下猶掩鴻名不彰其事則此等有如未盡不
以爲歡儻陛下以自咎責之心尚或未弭則羣臣不能
匡輔之罪是亦未除將何以蒙陛下之恩私將何以受
陛下之爵賞君猶含垢臣以偷榮羣下之情必深反側
伏惟陛下思聿脩無念之言顧屈已從人之義再膺大

典俯徇羣心實臣等之至誠實臣等之厚幸
柳宗元請德宗復尊號表曰某月日諸縣耆老詣臣陳狀辭意迫切以陛下尊號未復請詣闕下表者人心已鬱安可久違天意實勤諒難固拒撫狀感悅深契微誠伏惟陛下聖神之功貫於天地文武之道超乎古今盛德愈大而謙光益深元化已成而徽號未復遂使神祇缺望人庶怨思沐浴鴻澤者敢懷晷刻之安捧戴皇恩者不知寢食之適負愧懷憤萬方一心日日以冀遂淹星歲况今地不愛寶致百穀之豐穰天惟降衷呈衆瑞而繁委汙萊瘠鹵之地混成大田草木蟲獸之微化爲神貺萬

靈垂鑒昭然甚明此而不從臣所大惑矧又兵戎永戢夸狄咸懷煦然長春樂以終日是以前老等深感聖育踴躍不寧上奉天心跼蹐知懼頓顙闕下願復鴻名不謀而同無期而至此皆上元幽贊以誘其衷列聖垂靈以悟其意臣以爲陛下當敬於斯旨不可忽也臣又伏以陛下賞功與能舉賢出滯小言不廢片善是褒豈可使臣子之效雖微而必旌君父之德盡美而無稱凡在覆載孰不驚惶
第二表曰臣伏以耆老等並發丹誠將貫白日請復徽號以光聖謨臣以其懇款自中不可禁止遂抗表陳情備述微誠伏奉墨詔批答未蒙允許

衆心尚阻天意未從懇迫逾深戰兢無措伏惟陛下道
大益謙化成彌損雖江海善下每應朝宗之心而日月
居高久稱照臨之位况復上承天命下覩人誠若堅辭
之理有不可伏以陛下功參造化政體乾坤萬邦宅心
百靈效職此聖之至也明並兩曜信如四時先天不違
窮神知化此神之極也道德純被禮樂興行宸翰動於
三光睿藻窮於六義此文之備也五兵不試七德咸宣
殊方者知歸負固者率服此武之成也黃龍皓兔甘露
慶雲神禾嘉瓜祥蓮瑞木萬物暢遂百穀茂滋此天之
至靈也黎老班白伏守闕庭鰥嫠童幼謠歌道路此人

之至誠也有其德而無其號拒乎天而違乎人雖陛下
謙讓之至美抑非臣心之所安也伏以賤志雖明微誠
莫達戴天彌懼履地益慙不任懇迫屏營之至今上憲

宗尊號表

闕撰人姓名

曰臣聞皇階肇典必本其丕烈明號

允屬將御其成功所以開天地命曆之符合人靈慶感
之運臣等輒敢上稽天鑒下採人謠瀝懇陳辭冀乎睿
聽九重尊秘萬有顒顒誠未動天心如履薄伏惟陛下
一德繼統上符十天六龍時乘下壓羣嶽張寶圖以光
帝載懸玉鏡以澈襟靈休明會期則百神宜衛清淨子
物而萬邦式孚夫陰本於刑陽稱其德以刑則右武以

德則尚文今陛下宣威紀功示人以武也創業垂統示人以文也纂炎唐十一之盛陋宗周八百之期序庶徵於域中推賜履於閩外宇宙至廣每驚符瑞之繁動植殊輕奚答生成之造昔之述夏禹美宣王雖外軼其聲而中未盡善孰若陛下慮深一物精入萬樞發揮盛社啓迪鴻業自彼元和至於茲歲埽羣妖清巨祲率黎崇之不恪剗節枿之方圖或身暴都市或首懸藁街天英神繼不疾而速雖堯伏四罪殷征三年揆之於今彼有慙德固當仰應名實丕陟鴻徽闢乾位於象帝之文飭宸耀於惡氣之類豈可抱讓沖之微事曠祖宗之大猷

伏願納天人之貺采臣庶之誠昭示至公允塞羣議韓愈賀憲宗尊號表曰伏聞宰相公卿百官及關輔百姓耆老等以陛下功崇德鉅天成地平宜加號於殊常以昭示於來代載陳情款懇至再三陛下仰稽乾文俯順人志乃以新秋首序令月吉辰發揚鴻休膺受顯冊天人交慶日月揚光寰海之間含生之類抃歡踴躍以歌以舞臣聞體仁長人之謂元發而中節之謂和無所不通之謂聖妙算無方之謂神經緯天地之謂文戡定禍亂之謂武先天不違之謂法天道濟天下之謂應道伏惟元和聖神文武法天應道皇帝陛下子育億兆視

之如傷可謂體仁長人矣喜怒以類刑賞不差可謂發
而中節矣明照無私幽隱畢達可謂無所不通矣發號
出令雲行雨施可謂妙算無方矣三光順軌草木遂長
可謂經緯天地矣除剗寇盜宇縣清夸可謂戡定禍亂
矣風雨以時祥瑞輻輳可謂先天而天不違矣國內無
饑寒四夸皆朝貢可謂道濟天下矣衆美備具名寔相
當赫赫巍巍超今冠古方當講明堂辟雍之事撰太山
梁父之儀搜三代之逸禮補百王之漏典時乘六龍肆
覲東后微臣幸生聖代觸犯刑章假息海隅死亡無日
不與鳥獸率舞蠻夸縱觀爲此銜酸抱痛負恥且慙

李商隱賀武宗尊號表曰臣聞善言天者必推功於廣
覆善言日者必詠德於大明然後物仰蒼穹人知景曜
皇王擬象今古同規伏惟陛下體天垂蔭法日輪輝弘
上德以纘戎啓下武而應運頃從臨御旋致治平雨順
風調時推順適苗螟葉蟲坐致消亡是以銀甕石碑非
煙浪井神而告瑞史不絕書且獯鬻爲災周秦乏策金
行火運不絕於侵陵瀚海陰山幾渝於約誓陛下乃赫
以天威授之宏略一伐而單于僅免三鼓而貴主來還
滅大邦之仇讐據累聖之忿憤及晉陽逐帥代馬斥羈
陛下又濬發宸襟委諸廟畫浹辰而前軍就路逾月而

元惡膏磔淨豐派之遺疆舉陶唐之故俗葺爾潞子復
生孽童脫縲冀恩止柩拒詔據九折之險有五州之人
藪澤逋逃冀土租稅陛下又遠揚神斷深詔徂征合鎮
魏之強藩出韓彭之銳將夸其巢窟去彼根株清明王
之舊宮復金橋之故地曾非曠歲集此丕功固已至化
潛融事光於玉板元機獨運理溢於瑤編况又志切希
夸道存冲漠慕遺蹤於姑射載動堯心思順請於崆峒
欲勞軒拜將以休有萬齡臨茲兆衆使咸踐壽昌之域
俱遊富庶之鄉巍乎煥乎盛矣美矣故得人祇叶欲華
夏均懷願加尊顯之稱以報裁成之美宰臣等能陳大

義允建鴻名伊尹暨湯咸有一德咎繇謨禹克讚九功
述盡善於王猷標具美於帝錄南山稱壽北辰降光永
終無極之年長奉上清之號臣幸丁昌運方守洛京空
深戀闕之誠不在稱觴之列舉頭見日雖悲千里之遙
測管窺天且慶百生之幸萬壽無疆
請聽政表增唐于郤中書門下請聽政表曰臣等欽承
顧命遵守舊章冒陳至理上喧霄極冀迴三舍以幸萬
方而呼天未聞觸地無厝庶僚何恃而不恐率土何仰
而不憂竊以三漢成規備乎六冊六宗遺範列在史官
歷羣聖無以易其儀貫百王無以更斯制則知聖人達

節而俯就王者屈已以狗時故周發誓師當未葬之日
康王作誥繼憑凡之辰夫大孝在於述先執禮懲乎廢
命所以伯魚止慟稟趨庭之規孝景抑情循易月之制
今中夏雖寧而外郊猶警幸屬千年嗣聖九有惟新顧
循問豎之初迨今宅憂之日已交肫魄不決外虞普天
率土任重事殷一日暫曠萬務所擁况翌日之詔手澤
猶存敢忘導揚以塞恩顧且小大之理須稟聖規聽斷
之期已違先旨惟上帝之降命屬陛下以黎元宜以闡
皇綱創帝範副靈祇之望悅兆庶之心焉得極蓼莪之
哀忽宗社之重伏惟陛下仰思無改之道俯戒在茅之

責抑損至情覽決庶務存萬代之圖遺一介之善率繇
大道克允至公天下幸甚林逢宰臣等請聽政表曰
伏以萬機事繁不可久曠今則披瀝血誠乞親庶政聖
情哀塞未允愚哀夙夜兢憂是再陳啓伏惟皇帝誕受
欽明夙著睿哲道光王室運屬承天而孝感因心悲摧
過毀萬靈顛若未覩乾坤伏冀思繼體之大猷棄執哀
之小節行帝王代天之法薄曾閔匹夫之情特抑哀懷
俯躬朝政宗廟之業永遂和寧社稷之靈知其允答况
事非爲已道本徇公仰惟聖慈俯塞羣望臣等叨逢景
運獲列樞衡昧死竭愚布露丹懇伏紙殞越庶垂天鑒

又表曰臣聞樹之元后以牧蒸人猶日月之照臨不可以少曠如天地之覆育不可以暫虧故歷代明王取鑒於此必屈已以徇物遂抑哀而從宜期為彝章行於往古聖心哀迫未體至公羣臣憂疑罔知所措伏惟陛下溫恭允塞邁德文明承二百載之丕圖當十三聖之大業生靈所屬負荷不輕豈宜直貌棘心蹈小節而自遂寶符神器委大計而未臨且萬機事殷九有望切運當克構政在惟新顯顯蒼生日有所冀伏乞皇帝以安黎庶為念以保社稷為心對越上元克揚顧命俯從人願用答天休臣之悽悽實在於此况萬國將至七月匪

遙須務山陵以申孝敬在於營奉不可曠違抑有前規固無徇已伏惟特膺順變允叶情文抑至性而副羣誠略小善而彰大道則天下幸甚宇內和寧臣等生忝明時位當樞軸敬同羣品重啓宸嚴悃悃之誠至於死請望又表曰伏惟漢朝諸帝文稱明聖而著易月之典以為後代之法光武已降迄於我唐繼有睿哲之君不無明聖之主豈皆乏殷宗之孝豈盡無陛下之心但以所守者祖考之丕圖所臨者生靈之重事不敢徇已以屈萬姓不欲申志以蓋百王具在典謨莫得逾越况元和以前十一聖矣皆以孝理化於萬國迭承次守無議改

續伏惟以社稷爲心以邦國爲念以奉山陵爲至敬以安社稷爲至勤薄曾閔之菲名纂堯舜之盛業副中外之丹款濟蒼生之血誠臣等備任宰衡時逢昌運答先朝之眷遇承陛下之文明伏乞俯察愚心允茲羣望期於得請昧死上陳

柳宗元爲百官請聽政表曰臣聞聖凡殊途邦家異禮故王者捨已從物用身許天雖居達喪猶以事奪皇帝道成鑄鼎仙等馭龍萬姓長號九有顛望陛下以聰明睿聖嗣守寶圖爰及宅憂迨茲累日而孝思罔極尚輟乃權之言庶政未釐頗闕如絲之命臣等嘗覽載籍粗知喪紀若成周顧命歷代猶遵西

漢遺詔前王所奉我國家以孝理天下文明應期亦用此法胥以傳授蓋事歸至當則不可不遵禮貴從宜則不得不守理固然也臣等是以上陳愚懇輕黷宸嚴冀遂血誠俯親國政而陛下執喪逾切聽政未聞億兆嗷嗷不知所訴臣以爲天子之孝在於保安社稷司牧蒸黎功超百王慶流萬代亦何必守臣下之小節獲皇王之大猷固阻羣情務成謙德伏願以遺詔爲念奪在疚之懷就臨軒之制天下幸甚

御殿表增唐李嶠賀元日御正殿表曰上正三辰下臨萬國事雖舉舊命則維新臣聞聖祖垂訓王者處域中

之尊公羊紀時春者爲一歲之始載稽故寔抑有典章
近歲以來此禮多闕或事因惜費或時屬告休伏惟陛
下道際無垠政敷有紀全被發生之德無非訴合之仁
蒼旻降符黃輿告瑞石碑旣見文作太平銀甕旋臻字
成萬歲而又憂勤不輟克責方深精誠旁照於八紘懇
惻上通於九廟仙廚徹味獸館休畋遂使化妖宿爲壽
星變小戎爲餓殍慶由聖感令屬神行爰在新正式脩
闕典彤庭列位丹陛陳儀凝旒而天啓其門服袞而日
升於觀吳風發越兌澤滂沱左右賢臣駿奔多士國無
諛佞擢靈草而不搖朝絕奸邪儼神羊而莫動禮成而

退物有其容况以光耀瑤圖丹青玉板輝前映後邁五
登三臣竊訪碩儒遠徵舊典帝堯華封之祝唯止匹夫
神禹塗山之儀且非元會然猶堯有多憂之戒禹存後
至之誅在和平而尚乖孰歡呼之可致豈與茲日而得
同年臣方守河潼正分符竹不獲躬陳玉帛首率梯航
况又嘗以藝文叨居禁密雖遠離天上猶近接關西抃
賀空深就望無所心馳紫闕非夢寐而不通魂遶皇闈
羨歸飛而莫及 宋方岳賀御正殿表曰天臨南面於
赫當陽星拱北辰惟皇建極離麗於恭嘿無爲之後乾
行於始初觀政之時恭惟皇帝濬哲睿明廣淵齊聖三

年無改父道謙未處於法宮一德克享天心渙已新於
大號時乘龍御當宁虎門臣越在侯藩瞻言帝座朝既
盈矣勤勞願警於雞鳴夜如何其箴美莫陪於鸞噦
洪平齋賀御正殿表曰閭闔之開皇道曠脩日御之儀
鈞陳之衛紫垣肇正辰居之象萬邦星拱百辟雲從恭
惟皇帝繼體守文宅中圖大講朝元之典冊方重於建
儲循大曆之規禮將嚴於享帝適逢純吉首飾常居儼
負宸以端臨肅奉主而入覲屹壯泰山之勢歡傳嵩嶽
之呼臣心切傾葵職縻分竹願借方寸之地莫遂就堯
不違咫尺之天惟知戴舜圖李梅亭賀御福寧殿表曰

祕殿鼎新昭鴻名而日揭宸居離麗肅龍御以天臨風
來南面之薰星拱北辰之所恭惟陛下體元居正圖大
宅中福庶民以是訓之彝寧萬國以惟和之政盡力致
孝既卑夏禹之宮脩政攘夸復考宣王之室棟取諸北
鄙轉而豐鸞聲既便於觀旂鶴駕仍通於問寢誕敷文
德聿觀舞羽於兩階載績武功式燕躋堂之萬壽臣攝
麾黔鄙馳夢清都四海為家更願綢繆於牖戶萬民安
宅益堅壯麗之山河熾批答增永貞元年答宰臣上尊號表闕撰曰高祖太
宗接千載之統垂無疆之休太上皇承九聖之烈傳莫

大之慶嗣德績業允武允文弘帝堯之欽明宗元元之清靜付朕天下頤神保和至道光於唐虞至仁合於天地卿等虔述休德祇獻鴻名循省再三允符朕志朕獲守寶位丕承睿訓雖嚴恭寅畏不敢迨遑而澤未洽於羣生理未臻於皇極遽言徽號何以當之雖嘉乃誠難遂來請其上獻太上皇尊號宜依所奏凡百卿士當體至懷元和二年答宰臣請上尊號第三表闕撰人曰朕獲承丕緒以撫萬邦照臨無日月之明膏潤無江海之浸常恐吉蠲雖備未享於天心教導雖勤未諧於人欲諒慙菲德敢議鴻名而鼎臣宗公羣后庶尹上引祖

宗之丕矩下述黎獻之深誠誠予以處泰而思勞告予以受名而務實陳以懇迫至於再三先典不可以固違羣情不可以屢阻與其牢讓而繁飾不若納規而徇公遂抑至懷勉從來請顧惟不稱兢惕殊深寶曆元年答百寮上尊號表闕撰人曰前上三章皆有報旨推本

帝王之道研究天人之際可謂盡矣能無亮哉朕辭愈堅來奏愈懇考著龜之意酌卿士之心義貴從人事難徇志然體未濟之象敬慎居方復大畜之文模法往行虞舜勤人以恭已文王事帝而小心自勵則鑒乎殷湯盤銘持盈則戒乎周廟敲器還珠却馬使無愧於前修

菲食罷臺冀有示於來代率是道也庶無悔乎勉狗羣
心祇循祖訓敬允誠請愧惕良深元和十四年常袞
答南省上徽號表曰朕纘嗣鴻業託於王公之上常恐
涉道猶淺燭理未明夙夜祇畏罔或寧逸至於法天象
以垂制順人心而平亂立刑辟而不峻興禮樂而不倦
簡飭澆浮延納忠直思濟於道保合太和今寰海削平
載橐弓矢皆賴於輔弼之誠盡規於左右將帥之略宣
力於邦家循省表章請崇徽號武功文德揚美於予用
愧於懷何以及此尚以崑夸未敘邊鄙猶虞不果允從
宜斷來表 長慶二年元稹批宰臣上尊號第二表曰

朕聞天職生植聖職教化天職舉則四時行聖職脩則
萬方理然而天不以行四時爲德故蕩蕩無名聖不以
理萬物爲功故謙謙不宰顧朕小子獲承丕圖上賴祖
宗之靈下託股肱之力先定鎮冀次來幽燕皆吾日月
之所照臨車書之所轍跡失之則有以自愧得之則何
足自多况今四海雖清物力方困六戎雖伏邊備尚勞
百吏雖存官業多曠萬目雖設紀律未張有此四者不
敢遑寧思與卿等夙夜俾乂卿宜爲我提振大法脩明
政經讐竄戎夸阜康黎庶四者旣理名焉用之朕方以
臯夔之務委卿卿宜以堯舜之事教我驟加徽號深恥

近名循省表章難遂來請元稹批第三表曰昔齊桓
議封禪管仲驟諫其未宜晉武平江東何曾深惟於遠
馭彼二臣者居安思危之志明而有隱無犯之誠切也
况朕寡德謬膺昌期賴先帝削平之威蒙列聖浸漬之
澤聿來燕冀甫靖華夸既無德而有成寔以祥而為懼
卿等所宜朝夕納誨警予荒寧雖休勿休日慎一日而
乃過為溢美頻上鴻名諒多丹赤之誠殊非藥石之愛
汝為予礪為朕揣摩汝為予舟為朕康濟強我懿號不
若使我為有道之君加我虛名不若居我於無過之地
宜罷來請用副乃懷元稹批第四表曰朕以正月元

日祇見於九廟對越於上元千官在前萬乘在後覩聲
明文物之盛望城社宮闕之尊尚念高祖太宗艱難於
經營德宗憲考殷勤於丕緒復懼不克負荷以羞前人
寅畏嚴恭式冀無過而燕趙底定戎獯和寧寔惟列聖
之休安敢自大其義左右輔弼庶尹師長猥以鴻名願
加薄德三詔執事抑而不行物議逾堅予衷未信四陳
章表備引古今且曰告虔之時寧忘繼志問安之下胡
不慰心事有切於顯榮理難從於拘執於戲允恭克讓
既見奪於羣情克已為仁庶自勤於三省勉依來奏深
用愧懷白居易答宰相賀德音表曰古先聖王既託

人上與百姓同其欲與天下同其憂唯是推心可底於道朕臨御萬國迨茲五年惕厲之懷雖勤於夙夜伏臘之候猶害於歲時思革弊以救災在濟人而損己是用輕刑緩死責已恤貧罷郡國之珍貢省宮殿之煩費延春令而布仁行惠先南風而解愠阜財庶憑歡心以召和氣卿等或匪躬獻替或悉力弼諧啓沃之間已申霖雨之用燮理之際佇見陰陽之和各宜勉之以輔予理

章原魏曹植慶文帝受禪章曰陛下以聖德龍飛順天革命允答神符誕作民主乃祖先后積德累仁世濟其美以暨於先王先王勤恤民隱劬勞戮力以除其害經

營四方不遑啓處是用降茲福慶光啓於魏陛下承統纘戎前緒克廣德音綏靜內外紹先周之舊跡襲文武之懿德保大定功海內爲一豈不休哉帝又慶文帝受禪上禮章曰陛下以明聖之德受天顯命良辰即阼以臨天下洪化宣流洋溢宇內是以溥天率土莫不承風欣慶執贄奔走奉賀闕下况臣親體至戚懷歡踴躍

謚議原宋顏延之武帝謚議曰以爲聖哲同風功美殊稱蓋出乎道者無方故刑於物者不一伏惟道塞人神信通期運愛敬所稟因心則遠英粹之照正性自天體苞潛躍慮周卷舒龍德在陰雖艱貞而不悶因時而惕

故有來其必亨在晉之季皇塗薦阻欃槍干紀璿璣失
馭天鑒靈武民屬聖明不假十室之資不藉百乘之賦
首義馳風一鼓靜亂滌除泰階消殞薄蝕斯亮登庸之
基經綸之始者也內難雖弭外圖未輯河華海岱負固
相望荆濮燕亳侯服交侵眷言帝畿思康王路戎不再
駕遺氓即序斥埃之所未羈亭徼之所不譯莫不飾誠
請罪款塞來賓故能灑埽中嶽致廟九山神道會昌寶
命旣集損之而益後身愈先旣而儀刑帝載揖讓天歷
改玉乎文祖班瑞於神宗貫革寢機文武摺笏故宸居
兩楹坐示八表國訓成均之學家沾撫辜之仁大美配

天必終之以儉德道固萬葉猶申之以話言允所謂教
思無窮樹之長世取高上代顧邈前王矣梁沈約齊
武帝謚議曰臣聞天德平分而四時之名或異聖功一
揆而皇王之稱不同蓋跡因隨事名由義立堯臣禹佐
咸率茲典伏惟盡寂窮微含神獨照德茂始裳之主道
冠初耜之君含精靈於五緯駕貞明於三象初九勿用
英氣凌雲負揭日月仰揚霄漢龍姿鳳采煥若麗天登
庸在試盛績雲舉雖屈景潢汗降情尺木而拯世濟民
浚發懷抱昔成湯百家仁被比屋文王十里化先寡妻
前聖後賢重規沓矩震雄圖於九江播靈威於夏汭旌

旗未麾鯨鯢自殞弗勞羌楚之長無待六事之人義等
伐謀功高善陳建有國之符成定鼎之業會朝清明事
資於牧野受命作周非止於西伯視瞻寢門孝德光備
守器宗祧元良載遠嗣大寶以君百辟敷景化以致隆
平守在四夸威行海內囹圄寂寞禮讓交興八柄馭下
九官咸事臨朝凝默尊嚴若神風行日烜無思不暢至
仁與造化爭流靈威與雷霆齊軌上貫蒼昊下洞深泉
春無淒風夏無苦雨時若罔愆多稔如積三革不累五
刃不砥庠塾大啓儒雅雲集訓閱得宜蒐狩有序丹徼
青丘之野跂踵反舌之民浮深駕阻迴首革面北夸畏

力獻琛內款不藉終軍之使無假絕漠之威嘉祥霧合
秘瑞泉涌史不輟文簡無虛日方當垂七曜之旗駕八
龍之乘望禮中嶽肆觀羣后造化不仁穆卜愆應慕切
遺弓哀同遏密晦朔不居殯宮將啓勤茲大名宜盡徽
極又齊明帝謚議曰臣聞君德靡二辟王之名不一
聖功無爽堯禹之稱或殊兼以拯世寧亂致平未必同
道崇墀增祧嘉號不可相襲伏惟自天誕睿英聖在躬
皇矣之符夙著烝哉之謠早集賓門納揆天平地成自
南自北無思不躋在屬負圖導揚末命值嗣主狂凶人
倫道盡宗社阡危瞻烏靡託國難立長亂極治刑四海

洪鐘類考卷四十五
樂推三靈以眷東向而讓天下功高代入流涕而膺寶位如就重負日昃劬勞躬親庶事撫辜納隍之念義同於罪已振民厚下之情無廢於終食聰明神武逖聽邇聞萬目備張絃網靡漏御轡不迷寧藉聽於襄野大川可濟不待備於舟楫崢嶸之下澤靡不懷寥廓之上明無不燭包以宇宙潤以風雨霜露所交人跡所至百姓仰之而不知其始萬物用之而罔識其終土庠廢業忽焉已久三載弗爲淪弛將及臨朝引領思隆雅訓貴遊胥萃俊造成羣方將驅世反本旣仁且壽告成東嶽高宴汾陽造化不仁厭世云及放勳之慕不追負鄉之思

空遠殯宮將撤輜軫難留英聲茂實於是乎在任昉齊明帝謚議曰以爲窮神之跡無繼於成名教思所宗言歸於有稱是以則天爲大義盡於翼善武功受命理貫於斯文伏惟功高五讓道冠三極愛敬始於揚名孝饗終乎嚴配寥廓大度誕君人之符閨庭小節應軌物之訓歷試允諧納揆時序貽厥之寄義均負圖榱棟惟新壓焉將及於是承制宣德定策公卿登嗣后於西鍾反獨夫於侯服旣而主幼時艱仍離屯蹇應當璧之祥注息肩之願立德以長紹開中興擬度天行取則乾健日昃罷朝幽枉必達官曹寂寞圜犴空虛虎門肆義大

足協律巖廊有縉紳之談鄉塾無橫議之士既富而教
弘此孝治遂使家無蕩子野有栖畝置天下於掌握覽
八荒於戶牖寵微金穴之家恩絕椒風之館天應民和
祥符總暨故能上變雲物下漏深泉若乃青丘丹陵之
國黃銀紫玉之瑞幽符遠萃詢德報功方將馳道日觀
清宮鳴澤爲而不恃高揖成功百川所以朝宗參辰於
焉取正豈所謂中衢均奠縣衡共軌者歟梁元帝高
祖武皇帝謚議曰臣聞翼善傳聖曰堯仁聖盛明曰舜
受禪成功曰禹除虐去殘曰湯謚者行之跡號者功之
表雖賤不誅貴卑不誅尊而彰乎名者盛德之嘉號也

被於物者治定之實錄也斯所以聲名煥乎鐘石昭晰
備於管絃者焉伏惟天縱欽明惟睿作聖功超三五聲
踰七十仰之彌高就之彌遠載潛載躍乃武乃文先是
木運告終羣后改屬乾維罔構地紐如崩禘祀玷危公
卿盱食九牧有淪胥之悲八表興橫流之歎乃凝威黑
水表瑞丹陵雲合景從表裏提福受終文祖允恭克讓
知黔首不可以無歸蒼生不可以無主降汾陽之遠志
不得已而臨之於是類帝禋宗革命創制禘郊式展殷
薦斯潔臨茲大寶化與和氣俱宣扇此王風政與秋霜
並肅言懸日月功格區宇不以紫宸爲貴不以黃屋爲

尊政謚刑措民殷國阜虹旌式卷堡燧載清胥象相因
環楛無曠天衢亨泰王道升平南海候風東溟奉貢膏
露凝枝慶雲觸石山開蒼壁地出元珪驃騎把鉞則休
屠款塞太尉抗旌則名王麀角聲教所漸浹靈虵之都
威令所行通燭龍之外開庠建序布濩於成均正俗移
風氛氲於司樂虛納十亂引諒直之規廣闢四門弘招
賢之德青衿知擊壤之性黃髮恣鼓腹之歡加以鑽味
微言研精至道文終所牧之典史倚所讀之書無輟萬
機日且于遍馳郁郁之聲表乾乾之德允所謂皇哉君
哉日用而不知者矣方且告成岱嶽鏤升平之玉簡昭

事梁甫秘禮首之金繩而文王明夸事侔往冊黃帝橋
山痛深前典萬有淪傷三辰掩曜人祗軫慕山海含悲
慟切陟方哀深遏密煩冤荼毒貫切心髓風樹不靜陟
岵何期思所以欽若九功仰稽七德 北齊邢子才文
宣帝謚議曰伏惟聖德光遠神猷弘大初自登庸民譽
所集把尺持刀成務斯在百揆載清四門唯穆及天眷
既屬人謀所歸鳥獸遷情士女革面敬順天人拱揖羣
后處無上之尊居域中之大禮盛樂脩時和歲稔海內
有截天下泰然猶憂勞億兆經營四國同虞舜之巡省
若軒轅之靡寧威武紛紜神功四暢怨西以東化南自

北臨瀚海以浴兵登天山而緹馬左縈右拂擬歌成章
方朝百神於太華受萬國於稽嶺升中增封高拱垂衣
而天喪黎庶奄捐四海考妣之慕實被含生稱天作誅
抑唯恒數故以名追實盡物未臻其美屈道從制一日
可以成名 **增**唐蘇頌中宗謚議曰臣聞聖人極天下
之蹟以象其物宜成天下之文以察其時變加於百姓
之謂德刑於四方之謂風德也者動於神明風也者由
於教化伏惟皇帝纘武之命允文之基肇承於宥密以
至乎緝熙若乃含青雲之符耀赤光之瑞履順而一夸
險安貞而在潛躍由是恭於三朝服茲四罪僉予之始

祀夏而無改舊物若帝之初遷周而有膺新命既而三
年諒陰九族敦敘免喪問道穆乎天子之容退朝密藏
怡若家人之禮約躬而厚物盡下以推人翱翔乎儒雅
之林經營於文章之囿不傷麋卵不夭卉木體仁也行
於蠻貊暨於部臺施惠也酌中衢之尊不竭也陳太廟
之器不盈也故能百寶用四靈臻嘉禾神芝日獻於府
柔遠格懷荒至名駒鉅象歲填於牧方採原陵之露華
感而通夢遂揚昊壇之煙燎嚴以配尊然後心游絕冥
神寄愷樂在雲臺之上希夸於真諦之門追汾水之陽
縹緲乎列仙之館豈圖變生氛沴凶邁霄極龍攢既啓

鳥耘逾慕禮徹三獻北有因山之名法崇二言南有至郊之議 賈餗敬宗謚議曰定尊號考列聖終古之重事有司宜用大者遠者上質百王之明烈下開千載之成法參天人之意極臣下之誠酌而舉之以正大謚故稱天以誅大莫加焉微臣得議公莫至焉所謂大者遠者蓋總夫一朝之治化四海之惠澤夸夏之率職元元之受賜皇明所臨之遠近睿斷所繫之巨小何如耳其他苟不足以升降盛德者固得略而不論伏惟皇帝以英睿之資紹膺丕曆啓皇輝於磐石浴聖德於少海每欽承冊命天下感悅旣即尊位孝思踰顯列聖之道率

履不違禮行乎郊禋敬達乎宗廟富四海以致養榮兩宮以問安推恩廣愛累霑鴻渥發號施惠洽於百靈而又天資嚴正睿德沉毅時海內承憲宗穆宗威靈德澤之厚朝野無事生人休息初臨大寶委政宰庭春秋至富而遠畜剛辯旣閱庶務四聰益達英斷自己任賢不疑故卒能光啓誠明載安天下橫議或熾聖衷愈堅忠勲內外叶贊雄略於是舉兵食之大計示經營乎四方而不庭之藩首自夸殄礪志奮節視師於朝承風嚮化遐邇聳動夫不怒而威不戰而勝王者之武也惜乎號未光乎天地澤未浸乎四海而變生非慮遐抱天關生

靈之惋憤其可既乎臣謹上稽國典旁考物情約以經
義合諸謚法表功節惠庶叶大中 蘇滌宣宗謚議曰
皇天平分盛王全用施雷雨之廣澤則庶物生成務恩
威之至仁則四海亭育遂使含靈受泰觸類知懷美謚
大名固當稱謂伏維皇帝爰自盤維膺茲九五行越今
古仁被黔黎孝惟生知略不代出以天下爲已任視宇
內於掌中坐朝而不問風霜弭亂而不恡府帑動惟師
古慮必歸周聞善若驚去疾務盡前王之美事列聖之
令典必擴而行之加以講信脩睦任賢與能思念勲庸
則發凌煙之彩繪敦序友于則置雍和之宴錫俯閱才

彥則命法官諫官之次對愛憫生育則禁三月五月之
採捕一物之不得其宜納隍在慮四方之稍有未泰降
食爲心命將則千里坐知指縱則三邊克定是以人並
爲使物得自安加以西平羌戎南征蠻寇三州七關之
地坦然無虞四征際海之毗晏然自靜然後賑廩恤人
蠲農命使遠無不肅邇無不安姦宄戢心權豪屏息京
輦絕桴鼓之響邊陲無烽燿之虞可謂超三躋五度契
踰繩者矣 明楊廷和武宗謚議曰古先哲王繼天立
極凡有聖德大功顯被於當時必有鴻名美謚垂示於
後世蓋古今之通義臣子之至情自周以來未之有改

也然而謚以易名節以一惠要其終而原其始表其大而著其微號必稱情揚非虛美稽諸典禮而無愧質諸鬼神而無疑又先王所以閑萬世匪敢私一人者也恭惟皇帝首出庶物天挺英賢育德青宮講誦不分於寒暑談經翠幄興衰備覽於古今即位之初躬親理政詔令之下究極民情纂脩孝宗實錄以鋪張丕顯之謨續成通鑑纂要以繼述先朝之緒再舉尊崇之典孝事重闡特頒御製之詩睦親宗室屢增額數而嘉重進士之科創立規條而申嚴武舉之選會時艱之游至勞聖慮以多方變起維城釁生藩鎮邊塵驚於河曲烽火達於

甘泉命將出師聲罪致討大憝既獲磐宗載安受賑於社而振旅於疆戰勝於外而福生於內除惡務本去邪勿疑几席之憂弭之於頃刻蕭牆之變撲之於動勦內外無患是曰聖人威嚴不殺乃稱神武人方薦瘥天未悔禍盜賊滿野流亡載途自青兗以達兩河由楚越而亘西蜀數勤大將累發內兵授成算於九重收坐勝於萬里此則武功之再見也粵自丁丑訖於庚辰屬邊境之不寧致皇輿之遠狩天戈至止月捷頻聞日轂纒臨風煙頓息豈意南昌之地復爲逆狄之圖流言外聞甚於管蔡之惡姦黨內應急於吳楚之謀六飛親征萬軍

齊發曾無亡矢之費遂收除蔓之功茲豈人爲實有天
助此又武功之屢見也念天下之重事在嗣統之得人
遠導皇祖之明訓上承母后之懿旨奉迎聖明付託神
器此又漢唐以下人主傳受之明且正未有若今日之
事者也臣等竊嘗徧觀史冊所載歷代帝王前啓後承
必有文德以興炳蔚之教必有武功以振恬熙之風漢
之武帝唐之武宗皆以聰明果毅蹈厲發揚思欲震殊
俗而威遠夸勤耿謨而揚大烈以今方之殆同條而共
貫也

淵鑑類函卷四十五姪信大勳

淵鑑類函卷四十六

帝王部七

帝王總載

帝王總載十

詔

序

敕

啓

賦

令

再

箋

詩

詔增唐永昌元年改正朔詔曰朕聞上皇纂曆則天地

以裁規大聖握圖法陰陽以施化故能牢籠品類陶鑄

生靈敷景運於休期闡洪基於光大昔有隋失馭率土

分崩赤縣爲禾黍之場蒼生遇塗炭之酷我高祖龍興

汾晉鳳起寰區殄梟獍而安八荒翦鯨鯢而清四海太

宗膺昊穹之曆數鼓雷電之雄威服遠冠巢燧之前開

邊越義農之際鴻名邁於三五茂績隆於往初高宗稟

雷澤之禎符降天縱之神器湛恩所被匝乾坤覆載之
鄉至化所覃盡舟車所通之境撫璇丹極輯瑞蒼嚴天
平地成淳風啓千年之運樂和禮備寶祚隆三聖之基
逖聽王猷熙開帝載朕以虛薄虔奉睿圖業業兢兢不
遑寢食幸穹昊貽祐宗社延祥河薦合天之符洛出永
昌之籙時和歲稔遠肅邇安斯皆先德所延屢彰嘉貺
自恭臨兆庶已積炎涼尚想移風未臻於至道顧循菲
德媿切於深衷思弘顧託之恩再闡混元之始夫元穹
列象三辰以之麗天厚載含章五行於焉紀地易曰三
五以變錯綜其數遂成天下之文定天下之象水火相

變其卦爲革象曰天地革而四時成言五德更相生變
革萬象故帝者改正施教明受之於天不定之於人者
也自五帝纘統三王馭宇或父子相承同體異德或金
木迭改應天順人故納麓登庸粵受終於文祖干戈革
命必理曆於明時然則開元配永肇自陽來之旦統曆
履端基於朔易之首孳萌發內氣律由中品物任而昭
蘇生類蕩而敷革是知夏之人統不逮殷之地正殷之
地正有劣周之天統元命所苞實在茲矣周文稽古制
禮於成王之日漢高握德改元於武皇之代則知文制
大備未遑於上業損益之道諒屬於中平朕所以遵飾

禮經奉成先志今推三統之次國家得天統當以建子
之月爲正考之羣藝厥義明矣中宗興復神龍開創
詔曰聞天地盈虛四時有消息之度皇王興替五運有
遷革之期稱號斯殊驪駟亦異受明命者罔不由茲我
大唐高祖聖期首出天與神器有大功於區夏有大造
於生靈太宗道則繼明業推構極類商湯之起亳若姬
發之承周彈壓九皇牢籠萬古高宗上聖御圖大明司
契手調元氣心運洪爐齊五緯而平太階應三神而登
日觀羅網開闢包冠羲胥大猷備闡能事斯畢僊駕不
追逆臣開釁敬業挺炎於淮甸務挺潛應於沙場天柱

將搖地維方擾非撥亂之神功不能定人之危矣太后
亶聰成德濬哲應期用初九之英謀開太一之宏略振
玉鈴而殪封豕仗金鉞而斬長鯨受河洛之圖書當昊
穹之曆數惠育黎獻並登仁壽旣而凝懷問道屬想無
爲以大寶爲勞生遂復忝於明辟且有後命俾承先緒
光啓大唐之國用崇興復之基交際在辰情深感愴奉
高祖之宗廟尊太宗之社稷不失舊物實在於茲業旣
惟新事宜更始蘇頲睿宗禪位詔曰天下神器非上
聖無以運其機域中大業非元良無以固其本欽若靈
命寅奉神宗屈已順人用安四海承祧主鬯實貞萬國

頃者家臻大憫在疚惟憂梟獍滿衢豺狼塞路社稷之
守但望苞桑忠義之懷誰期艾棘階禍稔惡伺隙乘間
煩言碎辭所不勝述皇太子隆基正氣凝姿端命毓德
自家刑國英徽日甚移孝為忠雄謨電發北軍馳入埽
攬搶於紫微南宮反正開日月於黃道平亂寧國翼戴
朕躬一旅不勞功逾復禹七德咸舉事邈興周聲應吹
銅望當歸璧令司空讀冊侍中授璽實由立義豈曰尚
親承華肇開元嗣以建方流樂風之緒宜申洊雷之澤
朕爰初踐極喜氣呈祥天人叶心象緯昭貺官名有紀
年號用憑 開元受禪詔曰繼明嗣德王者所以承天

尊祖奉先聖人所以崇孝敬上之禮著乎重華月朔之
祠襲乎文命猗歟作頌發流濬哲之祥清廟升歌思表
配天之業歷選前載可得而言我國家首出開元繼文
膺統七代觀德至道洽於生人三后在天垂裕光於後
嗣太上皇帝道超寰表功軼帝先名言不測於乾行仁
智不知於日用累讓神器非以黃屋為尊俯膺大寶蓋
為蒼生屈志黎人於變淳化斯登載懷脫屣疇咨菲薄
竭讓德之志天眷莫迴陳拜首之誠中襟逾邈遂以寡
昧祇踐宸居循顧紹庭載深寅畏爰撰初吉躬展肅雍
虔肆獻之儀申大號之典神保之饗斯洽介福之道攸

宣億兆同歡人祇共慶蘇頲開元元年詔曰朕聞聖人無心同於吹萬上皇有道契於明一居天下之尊者至大體其大以照臨成天下之務者至公順其公以康濟故能稽昌曆考元符通於神祇格於上下鴻名不可以深拒盛典不可以固違斯豈在予而徇物也朕以菲德丕承聖訓埽除攬搶保衛宗稷內問安以承志外聽理以推誠始自朝廷納之以軌物終加蠻陌洎之以聲教欲令跂行喙飲含齒戴髮去其天扎蠲其疵癘每兢兢於紫座寧自貴於黃屋而凡我羣辟顧斯兆庶以爲人謀協從天意欽若王者人所歸也帝者天之號也歸

之者以德號之者以功然號以功成則功不可以不表歸以德厚則德不可以不勵朕猥屬與能之運遂忘沖讓之私將逮建寅之歲首甫擇建子之天統是用發揮景運受茲禮冊夫循名者責實謀始者慮終勉而全之非敢自滿所以克己思政惟懷永圖懼弗勝荷用多慙惕天寶改元詔曰古先哲王之致理也皆上順天心下稽人事時令贊發生之重祥符叶紀年之稱考彼前載斯爲大猷朕嗣守丕業洎三十年實賴宗社降靈昊穹孚祐萬方無事六府惟修寰宇晏然庶臻於理然則乾元在上仁覆爲首皇王臨下惠化攸先恩弘善貸用

廣慈育尊天寶之建元暢皇風於不宰况屬陽和布氣
獻歲發生宜覃在宥之恩式降維新之澤元稹文武
孝德皇帝冊尊號詔曰昔我高祖太宗化隋爲唐奄宅
區夏包舉四海全付子孫其何事哉彼昏盈而我勞敬
也明皇承之能大其業六戎八蠻罔不貢奉由是庶尹
弛政庶吏弛刑視人不勤視神不謹燕寇教起洞無藩
籬其何事哉據逸安而易萌漸也逮我聖父勤身披攘
斬斷誅除天下略定曾是幽冀賜予懷來荷賴景靈不
訓不墜環歲之內四方平寧粵予何功時帝之力而卿
大夫猥以大號加於眇身讓於四三益甚其請皇太后

如聞其事歡然慰心慈旨下臨臣誠上迫祇受大禮凜
乎余懷今卿大夫謂我爲文武孝德矣其將何道以匡
予予其業業兢兢日慎一日慕陶堯虞舜之行以自勉
思文祖憲考之道以自勤予苟不思無忘納誨於戲溢
美之名旣不克讓及物之澤夫何愛焉憲宗上尊號
詔曰朕聞惟人戴后因事必極於推尊惟辟奉天有善
必歸於讓德在敷景化以答元功居有勞謙之思進多
滿假之懼緬自遠古何嘗不由是而致理焉朕獲纘睿
圖祇膺神器上奉大祭下安羣生恭已臨軒兢兢懷馭朽
志欲周於四海念常切於一夫旰食宵興唯恐失墜運

屬休泰時丁小康方隅廓清氛祲銷盪斯乃上荷乾坤之垂祐宗社之降靈下賴卿士之叶心戎臣之宣力端拱嚮道推誠任能豈予寡昧用集丕績况至化猶鬱勤憂未寧而中外臣僚文武多士累陳懇疏並進昌言願獻鴻名以增虛美拒衆心而率籲轉切顧眇身而內愧靡安乃撰吉辰爰受典冊禋告於清廟虔聞於昊天當茲盛儀夕惕增厲於戲朕自御極再加景號在徽章而孔備諒浮實而多慙宜因行慶之辰誕布惟新之澤與物咸遂永孚於休武宗上尊號詔曰昔我高祖太宗始造區夏闢乾坤以覆載揭日月以照臨盛德耿光格

於上下昊天有成命我二后受之列聖丕圖克大其緒文綏武靖奕葉連枝逮予纘脩罔敢失墜誠欲追蹤在昔貽範將來陶未俗於至和返太朴於已散而道不足以居域中之大文不足以成天下之化恭已南面夙興夕惕遐想理古歉然於懷至於嗣歲豐穰寰海康靜祆沴滅息華夸大同茲實監祐自天匡救在下諒非已出安敢自多而三台百辟陳忠瀝懇加我大號其何以堪謂予守文宜述先志抑而不行者三請確而不拔者羣誠豈貪在已之名姑念從人之欲祇膺典策良深惕勵今維夏長養之時動植之物莫不自遂思有以導迎和

氣生活吾人是用稽犧經之作解法虞書之肆赦推恩
宥過思與同休。宣宗冊尊號詔曰我國家披皇圖以
立極執大象以升中睿父嗣孫重熙累盛逮予稽古聖
孝詔復中興洗滌宿氛廓開昌運天命不易賜予元符
荷宗社之耿光致寰瀛之小泰干戈載戢風順雨時豈
予菲薄汔此肅清皆中外元僚文武多士同心協贊而
使之然益用兢慙以戒盈滿而乃累陳丹懇願上鴻名
牢讓不從瀝誠彌切於戲昔賢有云舜何人也我何人
也苟或讓之不遂予亦敢不思齊今百執事謂予曰聖
敬敢忘繼志之義以是自勗庶無悔焉浮實之名旣不

獲已乘春之澤當務惟新。懿宗嗣登寶位詔曰朕聞
龍之騰天漢也則必乘風雲鼓雷電以震六合君之踐
大寶也則必敷仁惠煥號令以煦萬方是以地不間於
幽遐事罔論於輕重洪聖興而皇渥溥德音振而庶類
蘇故愆咎咸除枯沈盡起斯皆前代令典國朝成規委
轡諒戒於惠奸凝命始懷於布澤肆予寡德嗣續丕圖
夙夜乾兢若俯泉谷永維我高祖太宗之艱難締構又
維我列聖之慈儉統承思所以克紹休明弘濟億兆剋
眚俗之弊清理化之源肇祥導和應天順物致驩心於
率土知恭已以臨人爰申在宥之恩用洽維新之慶

宋太祖登極詔曰五運推移上帝於焉睠命三靈改卜
王者所以膺圖朕起自側微備嘗艱苦當周邦草昧從
二帝以徂征洎虞舜陟方翊嗣君而纂位但罄一心而
事上敢期百姓之與能屬以北敵侵疆邊民罹苦朕長
驅禁旅往殄塵氛鼓旗纜出於國門將校共推於天命
迫迴京闕欣戴眇躬幼主以曆數有歸尋行禪讓兆民
不可以無主萬機不可以曠時勉徇羣心已登大寶昔
湯武革命發大號以順人唐漢開基因始封而建國乘
時撫運既叶於謳謠及物推恩宜周於華夏於戲革故
鼎新景物初隆於王室青灾肆赦鴻恩普洽於民心更

賴將相王公協謀同力共裨寡昧以致升平凡爾萬方
咸知朕意恭元王鶚世祖即位詔曰朕惟祖宗肇造區
宇奄有四方武功迭興文治多闕五十餘年於此矣蓋
時有先後事有緩急天下大業非一聖一朝所能兼備
也先皇帝即位之初風飛雷厲將大有爲憂國愛民之
心雖切於已尊賢使能之道未得其人方董夔門之師
遽遺鼎湖之泣豈期餘恨竟弗克終肆子冲人渡江之
後蓋將深入焉乃聞國中重以僉軍之擾黎庶驚駭若
不能一朝居者予爲此懼驛騎馳歸目前之急雖紓境
外之兵未戢乃會羣議以集良規不意宗盟輒先推戴

左右萬里名王巨僚不召而來者有之不謀而同者皆是咸謂國家之大統不可久曠神人之重寄不可暫虛求之今日太祖嫡孫中先皇母弟之列以賢以長止予一人雖在征伐之間每存仁愛之念博施濟衆實可爲天下主天道助順人謀與能祖訓傳國大典於是乎在孰敢不從朕峻辭固讓至於再三祈懇益堅誓以死請於是俯循輿情勉登大寶自惟寡昧屬時多艱若涉淵冰罔知攸濟爰當臨御之始宜新弘遠之規祖述變通正在今日務施實德不尚虛文雖承平未易遽臻而饑渴所當先務略舉其切時便民條列於後嗚呼歷數攸

歸欽應上天之命勲親斯託敢忘烈祖之規建極體元與民更始朕所不逮更賴我遠近宗族中外文武同心協力獻可替否之助也爲又中統建元詔曰祖宗以神武定四方淳德御羣下朝廷草昧未遑潤色之文政事變通漸有綱維之目朕獲纘舊服載擴丕圖稽列聖之洪規講前代之定制建元表歲示人君萬世之傳紀時書王見天下一家之義法春秋之正始體大易之乾元炳煥皇猷權輿治道可自庚申歲五月十九日建號爲中統元年惟即位體元之始必立經陳紀爲先故內立都省以總權綱外設總司以平庶政仍以興利除害之

事補偏揀弊之方隨詔以頒申畫於后於戲秉錄握樞
必因時而建號施仁發政期與物以更新敷宣懇惻之
辭表著憂勞之意凡在臣庶體於至懷一徒單公履建
國號詔曰誕膺景命奄四海以宅尊必有美名紹百王
而紀統肇從隆古匪獨我家且唐之爲言蕩也堯以之
而著稱虞之爲言樂也舜因之而作號馴至禹興而湯
造互名夏大以殷中世降以還事殊非古雖乘時而有
國不以義而制稱爲秦爲漢者蓋從初起之地名曰隋
曰唐者又即始封之爵邑是皆徇百姓見聞之狃習要
一時經制之權宜槩以至公得無少貶我太祖皇帝握

乾符而起朔土以神武而膺帝圖四振天聲大恢土宇
輿圖之廣歷古所無頃者者宿詣庭奏章伸請謂旣成
於大業宜早定於鴻名在古制以當然於朕心乎何有
可建國號曰大元蓋取易經乾元之義茲大治流形於
庶品孰名資始之功予一人底寧於萬邦尤切體仁之
要事從因革道協天人於戲稱義而名故匪爲之溢美
孚休惟永尚不負於投艱嘉與敷天共隆大號主明太
祖登極詔曰朕惟中國之君自宋運旣終天命真人於
沙漠入中國爲天下主傳及子孫百有餘年今運亦終
海內土疆豪傑分爭朕本准右庶民荷上天眷顧祖宗

之靈遂成逐鹿之秋致英賢左右凡兩淮兩浙江東江西湖湘漢沔閩廣山東及西南諸部蠻夸各處寇攘屢命大將軍與諸將校奮揚威武已皆戡定民安田里今文武大臣百司衆庶合辭勸進尊朕爲皇帝以主黔黎勉狗輿情即皇帝位於南郊定有天下之號曰大明以是年爲洪武元年追尊四代考妣爲皇帝皇后建大社大稷於京師立妃馬氏爲皇后長子標爲皇太子布告天下咸使聞知成祖登極詔曰昔我皇考太祖高皇帝龍飛淮甸汛掃區宇東抵虞淵西踰崑崙南跨南交北際瀚海仁風義聲震盪六合習爽闇昧咸際光明三

十年間九有寧謐煌煌功業恢於湯武德澤廣布至仁彌流少主以幼冲之姿嗣守大業秉心不順崇信奸回改更成憲戕害諸王放黜師保禍機四發將及於朕朕爲高皇帝嫡子祖有明訓朝無正臣內有奸惡王得興兵討之朕遵奉條章舉兵以清君側之惡蓋出於不得已也使朕兵不舉天下亦將有聲罪而攻之者少主曾不反躬自責肆行旅拒朕荷天地祖宗之靈戰勝攻克擣之於塤上殲之於白溝破之於滄州潰之於藁城鏖之於夾河輸之於靈璧六戰而已不國朕於是駐師畿甸索其奸回庶幾周公輔成王之誼而乃不究朕懷闔

宮自焚自絕於宗社朕整師入京秋毫無犯諸王大臣
謂朕太祖之嫡順天應人天位不可以久虛神器不可
以無主上章勸進朕拒之再三而不獲乃俯徇輿情即
皇帝位自洪熙登極詔曰朕惟上天生民爰立君主仁
育兆庶咸底於泰和統御華彝同躋於熙皞我先皇帝
奉天撫運治化高於百王文德武功聲教被於四海比
緣邊警厯龍馭以親征逮及凱旋竟鼎湖之升逝遺命
神器付予眇躬顧哀疚之方深豈遵承之遽忍親王公
侯駙馬伯文武臣僚君民耆老四夸朝貢之使俯伏闕
下奉表勸進以爲天位不可以久虛生民不可以無主

長嫡承統國家常經陳辭再三瀝懇勤切用是仰遵遺
命俯徇輿情祇告天地宗廟社稷即皇帝位奉祖考之
洪祐仰聖神之永圖屬茲莅祚之初宣布維新之命
敕原梁沈約武帝踐阼後與諸州郡敕曰欽惟邃古爰
及近代雖禪代異時而成功一揆豈惟靜民寧亂實由
符運總集故能啓業垂統光宅區夏齊氏邁茲昏詖斯
亡奄及民命蠢蠢倒懸非喻朕大懼四海舟覆二象雲
傾億兆與崑岡並燎縉紳與蘊崇共日永言悽悼發憤
經營推鋒投袂電擊風掃藉上天之靈因熊羆之用德
未半古功侔前列齊氏旣欽若虞夏高揖萬邦兼以冥

符先著樂推攸在幽顯宅心辭不獲命猥以虛寡君臨
萬國川壑之懷寤寐盈慮方欲昧旦丕顯日昃忘勞思
與賢能康濟世道卿擁旄萬里共治是寄當求民瘼留
念獄市威斷以御強猾仁惠以撫貧孤使遠近幽深咸
得其所方虛位欽能懸爵佇効勿令漢代璽書獨行於
自古晉世班條靡用於茲日想加克勉副其側席增
唐張九齡處分朝集使敕曰朕恭已承天守文繼位布
一心於兆庶明四目於萬方恒恐道或未周物不遂性
旁求俊乂共理黎元於咨羣辟寧不我副凡今政要更
有四端衣食本於農桑禮樂興於學校流亡出於不足

爭訟由於無恥故先王務其三時將以厚生也脩其五
教將以惇俗也有國有家同知此義不患不知患在不
行耳必若縣得良宰萬戶息肩州有賢牧千里解帶仁
政不遙行之則是皆能勵節朕復何憂卿等還州遞相
勸勉遵此王度恤彼下人敬順天常無違月令夫星列
躔次土分區域休咎之徵惟人所感善必知生惡亦有
由每至歲成當加賞罰勸休未勸大典婚賦辭言身甫
令原晉元帝答劉琨等令曰方今岳牧伯之任股肱腹
心之臣萬邦之內九服之外咸見翼戴以隆天威是用
辭不獲已而居王位尋覽所陳弘旨優遠孤方當匡復

帝祚豈可猥居極位昔有夏克復賴靡艾之勲周宣中興由申召之佐二公鎮御幽朔忠以衛上建功拯難寔憑遠略夸難雪恥於是乎在梁任昉齊宣德皇后臨朝答梁王令曰承固茲謙抑未膺大典敬復雅旨良有憮然夫至寂難原言象所絕教思有律感通斯在所以異人者神明同人者用舍王誕茲上睿對越天行德冠二儀化周羣動生民以來一人而已但達節弘道每濡跡於中庸神照惟幾不抑心於鑽仰范宣旣讓其下取則况聖圖睿範歌思是歸廉約雖弘慶賞遂替誠賢者悅義長難進之風不肖者矜功沮竭力之効勸沮之間

所差已遠王何得不暫紆雅尚允答天人使朕夜艾以安早朝有預今遣率茲百辟申薦誠款萬致一塗煩言可略又敦勸梁王令曰夫功不在賞故庸勲之典蓋闕施侔造物則謝德之塗已寡要不得不強爲之名使銓宰有寄王實天生德齊聖廣淵重構參辰而九星仰止不易日月而二儀貞觀在昔晦明隱鱗戢翼博通羣籍而讓齒乎一卷之師劒氣凌雲而屈跡於萬夫之下辯析天口而似不能言文擅雕龍而成輒削豪爰在弱冠首應弓旌客遊梁朝聲華藉甚隆昌季年勤王始著建武惟新締構斯在功隆賞薄嘉庸莫疇一馬之田介

山之志愈厲六百之秩大樹之號斯存及擁旄司部代
馬不敢南牧推轂樊鄧胡塵罕嘗夕起惟彼狡童窮凶
極虐衣冠泯絕禮樂崩喪既而鞠旅誓衆言謀王室白
羽一麾黃鳥底定甲旣鱗下車亦瓦裂致天之屈拱揖
羣后豐功厚利無得而稱是以祥光總至休氣四塞五
老遊河飛星入昴元功茂勲若斯之盛而地狹乎四履
勢卑乎九伯帝有恧焉輜軒萃止今遣某等率茲百辟
人致其誠庶匪席之旨不遠而復又重敦勸梁王令
曰朕聞匹夫好仁義在摩踵君子行道達斯兼濟未有
盡器窮神蘊徽章乎天植高奠中尊覩傾壘而弗拯惟

王德冠往初功無與二四時等契兩曜齊明擬度天行
取則乾健而運距艱季道極百王援義而起一戎大定
羅山草草罔不率從用使商庭產蕙周闕樹梓傾宮旣
散鹿臺靡蓄盛德大業巍巍若此日者事岐之號爰發
帝言殊物備禮率由寡昧雖復雲罕載路清蹕啓行昭
德報功未臻其極而高揖天休遠存克讓俾予未亡與
慙日昃今遣某等率茲百辟人致誠請庶有感睿心霽
然降志人之世再觀日月重照參天又龜王於金聖齊
牋原梁任昉爲百辟勸進梁王牋曰伏承嘉命佇策明
公逡巡盛禮斯寔謙尊之旨未窮遠大之致向者嗣君

洪鑑類編卷四十一
棄常自絕宗社國命民生翦為仇讐折棟崩榱壓焉自
及卿士懷脯斲之痛黔首懼比屋之誅明公亮格天之
功拯水火之切再踵日月重綴參辰反龜玉於塗泥濟
斯民於阮岸使夫匹婦兒童羞言伊呂鄉校里塾恥談
五霸位卑乎阿衡地狹於曲阜明公宜祇奉天人允膺
大禮無使後予之歌同彼胥怨兼濟之仁翻為獨善
又牋曰近以朝命蘊崇冒奏丹誠奉披還令未蒙虛受
縉紳顛顛深所未達蓋聞受金於府通人之弘致高蹈
海隅匹夫之小節是以履乘石而周公不以為疑增玉
璜而太公不以為讓况世哲繼軌先德在民經綸草昧

歎深微管加以朱方之役荆河是依班師振旅大造王
室雖復累跡救宋重胝存楚居今觀古曾何足云而惑
甚盜鐘功疑不賞皇天后土不勝其酷是以玉馬駿奔
表微子之去金版出地告龍逢之怨明公據鞍輒哭厲
三軍之志獨居淹涕激義士之心故能使海若登祇罄
圖効祉山戎孤竹束馬景從伐罪弔民匡時靖亂匪叨
天功實勤濡足且明公本自諸生取樂名教道風素論
坐鎮雅俗不習孫吳構茲神武驅盡誅之氓濟必封之
俗龜玉不毀誰之功歟獨為君子將使伊周何地某等
不達通變寔有愚誠不任慙欵棘心重謁伏願特膺典

策式副民望不封煇棘必重臨於輿典
序增宋顏延之三月三日曲水詩序曰夫方策既載皇
王之迹已殊鐘石畢陳舞詠之情不替雖淵流遂往詳
略異聞然其宅天衷立民極莫不崇尚其道神明其位
拓世貽統固萬葉而為量者也有宋函夏帝圖弘遠高
祖以聖武定鼎規同造物皇上以叡文承歷景屬宸居
隆周之卜既永宗漢之兆在焉正體毓德於少陽王宰
宣哲於元輔晷緯昭應山瀆效靈五方雜遝四隩來暨
選賢建戚則擇之於茂典施命發號必酌之於故實大
予協樂上庠肆教章程明密品式周備國容眡令而動

軍政象物而具箴闕記言校文講藝之官采遺於內轡
車朱軒懷荒振遠之使論德於外賴莖素毳并柯共穗
之瑞史不絕書棧山航海踰沙軼漠之貢府無虛月列
燧千城通驛萬里穹居之君內首稟朔卉服之酋迴面
受吏是以異人慕響俊民間出警蹕清夸表裏悅穆將
徙縣中宇張樂岱郊增類帝之壇飾禮神之館塗歌邑
誦以望屬車之塵者久矣齊王融三月三日曲水詩
序曰我大齊之握機創歷誕命建家接禮貳宮考庸太
室幽明獻期雷風通響昭華之珍既徙延喜之玉攸歸
革宋受天保生萬國度邑靜鹿丘之歎遷鼎息大垵之

海錄卷之四十一
慙紹清和於帝猷聯顯懿於王表駿發開其遠祥定爾
固其洪業皇帝體膺上聖運鍾下武冠五行之秀氣邁
三代之英風昭章雲漢暉麗日月牢籠天地彈壓山川
設神理以景俗敷文化以柔遠澤普汎而無私法含弘
而不殺猶且具明廢寢晷晷忘餐念負重於春冰懷御
奔於秋駕可謂巍巍弗與蕩蕩難名秉靈圖而非泰涉
孟門其何險用能免羣生於湯火納百姓於休和草萊
樂業守屏稱事引鏡皆明目臨池無洗耳沈冥之怨旣
缺邁軸之疾已消興廉舉孝歲時於外府署行議年日
夕於中甸協律總章之司序倫正俗崇文成均之職道

德齊禮挈壺宣夜辨氣朔於靈臺書笏珥彤紀言事於
仙室褰帷斷裳危冠空履之吏影搖武猛扛鼎揭旗之
士勤恤民隱糾逃王慝射集隼於高墉繳大風於長隧
不仁者遠惟道斯行讒莠菴聞攘爭掩息稀鳴桴於砥
路鞠茂草於園扉耆年闕市井之游稚齒豐車馬之好
宮鄰昭泰荒憬清夸侮食來王左言入侍離身反踵之
君鬢首貫胸之長屈膝厥角請受纓縻文鉞碧砮之琛
奇幹善芳之賦紉牛露犬之玩乘黃茲白之駟盈衍儲
邸充物郊虞甌牘相尋鞮譯無曠一尉候於西東合車
書於南北暢轂埋鞞鞞之轍綏旌卷悠悠之旆四方無

滄海集卷四十一
拂五戎不距偃革辭軒銷金罷刃天瑞降地符升澤馬
來器車出紫脫華朱英秀佞枝植曆草孽雲潤星暉風
揚月至江海呈象龜龍載文方握河沈璧封山紀石邁
三五而不追踐八九之遙跡功既成矣世既貞矣信可
以優游暇豫作樂崇德者與王梁陸倕石關銘序曰昔
在舜格文祖禹至神宗周變商俗湯黜夏政雖革命殊
乎因襲揖讓異於干戈而晷緯冥合天人啓基克明峻
德大庇生民其揆一也在齊之季威侮五行怠棄三正
刑酷然炭暴踰膏柱民怨神怒衆叛親離踏地無歸瞻
烏靡託於是我皇帝拯之迺操斗極把鈞陳翼百神提

萬福龍飛黑水虎步西河雷動風驅天行地止命旅致
屯雲之應登壇有降火之祥龜筮協從人祇響附穿胸
露頂之豪箕坐椎髻之長莫不援旗請奮執銳爭先夏
首憑固庸岷負阻協彼離心抗茲同德帝赫斯怒秣馬
訓兵嚴鼓未通凶渠泥首弘舸連舳巨艦接艦鐵馬千
羣朱旗萬里折簡而禽廬九傳檄以下湘羅兵不血刃
士無遺鏃樊鄧威懷巴黔底定於是流湯之黨握炭之
徒守似藩籬戰同枯朽革車近次師營商牧華夸士女
冠蓋相望扶老攜幼一旦雲集壺漿塞野簞食盈塗似
夏民之附成湯殷士之窺周武安老懷少伐罪弔民農

不遷業市無易賈八方入計四隩奉圖羽檄交馳軍書
狎至一日二日非止萬機而尊嚴之度不讐於師旅淵
默之容無改於行陣計如投水思若轉規策定帷幄謀
成几案曾未浹辰獨夫授首迺焚其綺席棄彼寶衣歸
璇臺之珠反諸侯之玉指麾而四海隆平下車而天下
大定拯茲塗炭救此橫流功均天地明並日月於是仰
協三靈俯從億兆受昭華之玉納龍敍之圖類帝禋宗
光有神器升中以祀羣望攝袂而朝諸夏布教都畿班
政方外謀協上策刑從中典南服緩耳西羈反舌劔騎
穹廬之國同州共穴之人莫不屈膝交臂厥角稽顙鑿

空萬里攘地重都幕南罷鄣河西無警於是治定功成
邇安遠肅忘茲鹿駭息此狼顧乃正六樂治五禮改章
程創法律置博士之職而著錄之生若雲開集雅之館
而款關之學如市興建庠序啓設郊丘一介之才必記
無文之典咸秩於是天下學士靡然向風人識廉隅家
知禮讓教臻侍子化洽期門區宇乂安方面靜息役休
務簡歲阜民和歷代規謨前王典故莫不芟夸翦截允
執厥中原梁沈約武帝集序曰文思安安欽明所以
光宅日月光華南風所以興詠日角之主出自諸生銳
頂之君少明古學漢高宋武雖闕章句歌大風以還沛

好清談於暮年夫成天地之大功膺樂推之寶運未或不文武兼資能事斯畢者也我皇誕縱自天生知在御清明內發疏通外典爰始貴遊篤志經術究淹中之雅旨盡曲臺之奧義莫不因流極源披條振藻若前疑往滯舊學罕通而超然直詣妙援終古善發談端精於持論置壘難踰摧鋒莫擬有同成誦無假含毫興絕節於高唱振清辭於蘭畹至於春風秋月送別望歸皇王高宴心期促賞莫不超挺睿興濬發神衷及登庸歷試辭翰繁蔚燦記風動表議雲飛雕蟲小藝無累大道懷君人之大德有事君之小心爲下奉上形於辭旨雖密奏

忠規遺橐必削而國謨藩政存者猶多逮乎俯應歸運仰脩乾錄載筆握簡各有司存如綸之旨時或染翰暨於設簾靈囿愷樂在鎬鹿鳴四牡皇華棠棣之歌伐木採薇出車杖杜之讌皆詠志摛藻廣命羣臣上與日月爭光下與鐘石比韻事同觀海義等窺天觀之而不測遊之而不知者矣竊惟左史記言右史記事君舉必書無論大小况乎感而後思思而後積積而後滿滿而後言若斯而已哉謹因事立名隨源編次

增唐太宗帝範序曰朕聞大德曰生大寶曰位辨其上下樹其君臣所以撫育黎元陶鈞庶類自非克明克哲允武允文皇

天眷命曆數在躬安可以濫握靈圖叨臨神器是以翠
媯薦陶唐之德元圭錫大禹之功丹羽呈祥周開七百
之祚素靈表瑞漢啓重華之基由此觀之帝王之業非
可以智競不可以力爭者矣昔隋季版蕩海內分崩先
皇以神武之姿當經綸之會斬靈蛇而定王業啓金鏡
而握天樞然猶五嶽含氣三光戢耀豺狼尚梗風塵未
定余以弱冠之年懷慷慨之志思靖大難以濟蒼生躬
擐甲冑親當矢石夕對以魚麗之陳朝臨以鶴翼之圍
敵無大而不摧兵無堅而不破翦長鯨而清四海埽欃
槍而廓八紘旣而承佑天潢澄清璇極襲重光之永業

繼寶籙之隆基戰戰兢兢若御深而馭朽日慎一日冀
善始而令終汝以幼年偏鍾慈愛未辨君臣之禮度不
知稼穡之艱難余每思此爲憂未嘗不廢寢忘食今自
軒昊以降迄於周隋經天緯地之君纂業承基之主興
亡治亂其道煥然所以披鏡前蹤博採史籍聚其要言
以爲近誡云爾密王勃九成宮頌序曰國家梯霄架極
罄域栽基纂高丘白雲之肩鬱函都紫氣之兆宸扉旣
闢一宇宙而來王聖籙潛躋貳乾坤而作帝高祖天旗
夜立制黃鳥而九驅太宗日馭晨飛駮綠蟠而首出雖
立極承祧之業進燭前文而重光累洽之符歸功下武

陛下承靈太乙踵睿登三星虹沓社電蚪發慶丹書碧
篆神符煥河洛之文玉斗珠衡天骨挺皇王之表用能
捨桐珪而瑄七鬯肅玉籍而揖宗祧寫霽九天騰景萬
里御風雷七曜於上博臨之功顯用山川六府於下輔
相之宜得元功密運敷造化於靈襟黃屋神凝創經綸
於寶思鳳幃宵靜陰靈宣玉閭之華鶴禁朝趨離象峻
銅樓之景川分帝子控鯤壑而疏源岳動天孫擁熊山
而列鎮其成化也如彼其強幹也如此猶乃停旒正室
嚴續中軒玉階匪泰金門爲險佇虹旃於月澗岳瀆生
光飛鶴槩於煙泉江湖動色桃溪逸彥塞丹井而歸風

松磴遺英斬元關而奉制位兼河海九卿叅巨濟之功
道合星辰三事鬱經天之象朱轡緝化泣故老於中溪
墨綬宣風繞春童於上陌王化之基已洽天上之代有
序建銅儀而測曜象緯齊懸按璿璣而書雲禎氛疊舉
祥噦十二紫鸞調夏谷之音大禮三千頽蛇應黃鍾之
曲蠶功順令業著於青裳蜃磨迎春恩周於黛耜黃沙
靜讞爽鳩興頓足之悲丹石銷寃神獬輟推鋒之計咏
時和於地壤動植咸驩歌道泰於華封昆蟲自樂星墟
列將輝玉節而長驅天策神兵下金壇而決勝橫麾赤
版蔥山成不戰之郊會繳青丘桃野見其亡之兆煙馳

火徼勵珠產而移琛雪鷺冰洲駕瑤谿而納賁乾坤徑
復載遵赤縣之封曦望環周未出黃圖之域故夫含吐
萬物至功也制平八表大業也一陰一陽神道也乃文
乃武聖圖也用能使天不愛寶地不藏珍日月五行風
雲四序龍章鳳彩鳥奕於郊墟黃鉉紫玉磊砢於垆圉
集風雲於翠筵浴甘露於朱英澤馬飛鑣山輿結轍殊
徽狎至祥書竭東郭之毫累譯同歸朝冊盡南山之竹
然後瑤壇備物陳帝服而展皇儀后室疇庸登泰山而
小天下功弘事畢狹廣宙而三遷風舉雲搖歷神都而
一憩考遺基於汶上稽典故典於淹中光總章之瑞紀嗣

乾封之寶曆大矣哉昇中作睿握四海而為尊則大斯
模肇三宮而配永明宋濂洪武聖政記序曰自古帝
王創業垂統方有事於征伐而於彌綸天下之治具勢
或未遑及其大統既集亦不過振厥宏綱而萬目未盡
舉焉如漢之高帝得國最正雖曰算無遺策而施之政
令猶乏精詳故史臣贊之亦但云規模宏遠而已夫以
高帝之雄傑尚如此則其餘從可知矣洪惟皇上以布
衣受天命蓋與高帝同雖當開拓土疆之際停戈講藝
息馬論道夜以繼日無一夕之寧迨正天位朝萬國孳
孳圖治恒若不足於是綱舉於上目備於下誠有非高

帝所可及是故郊廟以及百神之祭禮文咸秩則祀事
嚴矣御極之日即立儲位以正青宮則大本定矣衆建
諸王列封功臣則大分昭矣兵戎之衆自京師達於郡
府率皆設衛權一出於朝廷而爲將者不得私而軍政
肅矣中外官有定制一革冗濫之弊而倖位絕矣冠服
有別防範有嚴而民志自定無僭侈矣他如申禁令覈
實效育人才優前代正禮儀之失去海嶽之封嚴宮壺
之法勵忠節之訓刷積歲之弊如斯之類不一而足或
前王所未得或行之有未至者皆煥然有條可以垂法
後世此其故何哉蓋自近代以來習俗圯壞殆將百年

而天生大有爲之君首出庶物一新舊染之俗與民更
始是故睿思所斷動契典則度越千古咸無與讓此正
所謂錫智勇而正萬邦也臣備位詞林以文字爲職業
親見盛德大業日新月著於是與僚屬謀取其有關政
要者編集成書名曰洪武聖政記然而天之高明也萬
物莫不覆焉地之博厚也萬物無不載焉聖人之作也
萬物咸興欣覩焉故凡金科之頒玉律之列著之於商
書刻之於琬琰傳之於聖子神孫者將與天地相爲無
窮書曰惟天聰明惟聖時憲詩曰貽厥孫謀以燕翼子
此之謂也其所以致四海雍熙之洽比隆於唐虞三代

者豈不在於茲乎。延四載，垂照之合。此劉文惠真三升。
啓原。梁沈約賀齊明帝登阼，啓曰：竊惟皇源浚遠，帝寶
連暉。基深慶厚，道貫萬葉。而鬱林凶德，早樹行悖。人經
逃聽之所未書，宗廟之殆如綴。百靈聳動，九服迴遑。結
後來之望，思庇民之主。日月以冀遐邇，翹心伏惟陛下。
大聖在躬，君德夙表。龍章日采，煥若麗天。納麓賓門，道
風遐被。睿化神行，無思不洽。獄訟允歸，天人戴仰。屈飛
龍之眇轡，紆汾陽之遠情。運堯心以臨億兆，敷舜烈以
膺寶命。雖中宗之興殷，道宣后之隆漢，德異世同。符千
載一揆，刑措之業方遠。隆平之基在焉。率土含欣，懷生

戴賴。况臣早蒙覆潤，夙荷恩靈。踴躍外畿，心不勝慶。謹
縉民和式，流皇澤塗。歌里抃載，懷鳧藻謝辭奏請之
賦增。漢班固東都賦曰：往者王莽作逆，漢祚中缺。天人
致誅，六合相滅。故下人號而上訴，上帝懷而降監。乃致
命乎聖皇。於是聖皇乃握乾符，闡坤珍。披皇圖，稽帝文。
赫然發憤，應若興雲。霆擊昆陽，憑怒雷震。遂超大河，跨
北嶽。立號高邑，建都河洛。紹百王之荒屯，因造化之盪
滌。體元立制，繼天而作。系唐統，接漢緒。茂育羣生，恢復
疆宇。勲兼乎在昔，事勤乎三五。豈特方軌並跡，紛綸后
辟。治近古之所務，蹈一聖之險易。云爾哉。且夫建武之

元天地革命四海之內更造夫婦肇有父子君臣初建人倫實始斯乃伏羲氏之所以基皇德也分州土立市朝作舟輿造器械斯乃軒轅氏之所以開帝功也龔行天罰應天順人斯乃湯武之所以昭王業也遷都改邑有殷宗中興之則焉即土之中有周成隆平之制焉不階尺土一人之柄同符乎高祖克己復禮以奉終始允恭乎孝文憲章稽古封岱勒成儀炳乎世宗案六經而校德眇古昔而論功仁聖之事既該而帝王之道備矣至於永平之際重熙而累洽盛三雍之上儀脩袞龍之法服鋪鴻藻信景鑠揚世廟正雅樂人神之和允洽羣

臣之序既肅乃動大輅遵皇衢省方巡狩躬覽萬國之有無考聲教之所被散皇明以燭幽然後增周舊修洛邑扇巍巍顯翼翼光漢京於諸夏總八方而爲之極是以皇城之內宮室光明闕庭神麗奢不可踰儉不能侈於是薦三犧效五牲禮神祇懷百靈觀明堂臨辟雍揚緝熙宣皇風登靈臺考休徵俯仰乎乾坤參象乎聖躬目中夏而布德瞰四裔而抗稜西盪河源東澹海濬北動幽崖南耀朱垠殊方別區界絕而不鄰自孝武之所不征孝宣之所未臣莫不陸讐水慄奔走而來賓遂綏哀宰開永昌春王三朝會同漢京是日也天子受四海

之圖籍膺萬國之貢珍內撫諸夏外綏百蠻爾乃盛禮
興樂供帳置乎雲龍之庭陳百寮而贊羣后究皇儀而
展帝容於是庭實千品旨酒萬鍾列金罍班玉觴嘉珍
御太牢饗爾乃食舉雍徹太師奏樂陳金石布絲竹鐘
鼓鏗鉦管絃焯煜抗五聲極六律歌九功舞八佾韶武
備泰古畢四夸間奏德廣所及傑侏兜離罔不具集萬
樂備百禮暨皇歡浹羣臣醉降烟煜調元氣然後撞鐘
告罷百寮遂退於是皇上親萬方之歡娛又沐浴於膏
澤懼其侈心之將萌而怠於東作也乃申舊章下明詔
命有司班憲度昭節儉示太素去後宮之麗飾損乘輿

之服御抑工商之淫業興農桑之盛務遂令海內棄末
而反本背僞而歸真女脩織紉男務耕耘器用陶匏服
尚素元恥纖靡而不服賤奇麗而弗珍捐金於山沈珠
於淵於是百姓滌瑕盪穢而鏡至清形神寂寞耳目不
營嗜欲之源滅廉恥之心生莫不優游而自得玉潤而
金聲是以四海之內學校如林庠序盈門獻酬交錯俎
豆莘莘下舞上歌蹈德詠仁登降飫宴之禮既畢因相
與嗟歎元德讜言弘說咸含和而吐氣頌曰盛哉乎斯
世唐述聖賦闕撰人姓名曰臣聞立極著紀之初闢乾開
歷之始上所以分垂象曜下所以疆括地理惟大人之

有作越百代而孤峙飛五位以龍奮騰九萬而鵬越曩
者炎運將終鼎命去絕四溟波駭八維幅裂羽檄交馳
邊烽並熱長星夜埽車雲朝結莫不望壁壘以靡旗對
轅門而亂轍故得百城冰潰千里煙滅固靈命之有在
乃慷慨而投袂驅八駿以雷擊馭六飛而電逝騰星劍
以外倚振雲鋒而高彗既後事而先謀亦先勝而後制
兵有臨而必尅功無往而不濟龜策叶以符兆人神應
而合契諒包項以駕軒寶孕皇而育帝足以光燭千祀
足以祚隆萬世於是戢兵偃武銘功紀勳採三代之逸
經刊八方之遺籍搜隱遁於林藪訪栖遲於巖石然後

調玉律以定時測金儀而考曆符洛下之前驗嗣容成
之絕迹若夫流惠澤於瀛表被仁風於區外窮八際以
來庭踰九譯而浹會莫不削衽而崇禮樂解辮而襲冠
帶參兩曜以齊明混二儀以稱大信一人之致感實萬
方之攸賴聖皇以令叶先甲時惟仲春乃整法駕馭華
輪六軍雷動萬乘星陳臨濁河以北睠指清洛而東巡
乃升雲闕俯天津朝萬國禮百神珍賚咸集要荒畢臻
夫其地也據三州以設險憑四關而作固總奔湊於八
方測圭影於中度既定鼎於周業亦克昌於漢祚望嵩
巒之遷迤臨峭坂之迴互所以仰叶辰象所以俯清天

步於是凝聖情以遠慮思成敗於中古美揖讓於有虞
壯成功於大禹恥用兵於中冀鄙窮戰於丹浦每有違
於汝弼恒知失而思補乃命促苑囿散積聚改制度易
規矩削侈麗於樓臺崇質素於階宇仁好生而必遂德
無賞而不輔習嘉禮於玉帛和大樂於鐘鼓上可以降
集羣瑞下可以安懷率土惟聖作之可觀實萬物而斯
覩顧况高祖受命造唐賦曰在桓靈之道曠兮本小
而末大下陵而上替君臣相失南北歷帝醜隋而命唐
纂周漢之鴻裔高皇生而豁達大度狗齊弱而能言神
光佳氣兮爛以氛氲兆白雀兮戴紫雲隱隱曠曠兮始

乎太原君子得時有如追奔岷峨遵江兮河出崑崙雷
砰電掣浩浩渾渾厥波雖雄爲海所吞乾健而坤順兮
利配乾而法坤有何姦豪恃險偷存乃建皇極鍾乎歷
數革舊鼎新兮式閤封墓走百神以咸秩兮包五嶽而
作固過蒲津而川后增流兮次霍邑而山靈告路彼尚
慘黷兮我寬刑以薄賦陋茅屋乎土階遵朱干與大輅
乃有嚴更之署環衛鈎陳文昌武庫玉冊韜府兮內八
景之真文金盤粲霞兮承九天之清露元聖有作恢法
度也厥祖草昧諸夏宗臣蠻夸酋長從德如歸若王固
讓而天下可違乎有社稷焉不可闕祀有烝人焉不可

無主是以木曰威仰火曰熛怒辰戌丑未王我唐土神
祇叶從龜筮攸同乃更正朔以刀文爲開通告於上下
予昧乃德嘉乃丕績若將殞於厥躬草艾渠魁兮罔駕
英雄拔萬姓於湯火兮散三光於昊穹此皇王所以職
教化也非天不應非聖不作造我鉅唐在夏之興弼成
九服經啓九道荒厥迹之茫茫在周之興西至流沙東
至樂浪重九譯乎越裳在漢之盛大夏身毒月支夜郎
辰韓之國盡革傍行未若我唐歌其聲舞其容十有二
部鏡立乎中央提封所經聲教所被窮天下之琛怪截
海外之梯航逾蟠桃而跨弱水兮蓋四十萬里鳥飛驥

驟兮鱗萃乎餘鯢凝碧樹於洞房送白雲於帝鄉舞破
陣於清廟兮準文始與西廂迎氣於東郊兮養老於上
庠禘祫之禮秬鬯圭瓚兮辟雍明堂襲蛟鱸之馥馥疊
鼉鼓之鏜鏜羽林孤兒青衿胄子森琳瑯以鏘鏘河山
巨防百二盤岡渭水貫都兮來天漢之湯湯浞龍宮而
捎鬼國延苑囿而峻墉隍驅馳駒駟犀象垂黃附驥之
馬骨騰肉飛滅沒陸梁驚出女床鷄鷄白鷗孔雀翱翔
縮沙磧與江湘休徵四塞兮花萼連芳大容揮絃兮子
晉吹簧飛廉馳道兮河鼓服箱雍門韓娥流徵叩商徹
歌鐘於未央校羽獵於長楊垂衣治天下賦

闕撰人姓名

曰天曠唐帝恭承永命守無事爲至德彰不言爲大令
當宇而百蠻自賓垂衣而八極居正當書軌以混合系
祖宗而作聖治契無外人羞有爲戴北極以定位比南
山而不移皇皇焉儼六服以御寓燭燭焉虛四聰而聽
卑備其文火龍迴帶以如動藏乎用天地成功而不知
與區夏再造俾古今同道靜以虛襟固其大寶儲精而
雲鬱冠蓋恭已而耀生黼藻故能追軒皇躡陶唐文物
周衛邦家有光颯祥雲乎五彩蟠瑞靄於六章豈徒具
飾乎領袖亦以權量乎圓方是知垂拱者古之難委裘
者聖之旨蓋與神合寧將智使不然何以酌天心安地

紀一家之大無煩車馬以巡遊九重雖深盡見山川之
疆理形神不拘清淨爲徒體安以一襲道洽於三無俟
時不在於顛倒致美何傷乎曳婁於時天淨泰階城開
外戶應星精以列將動岳神而生輔楚製者分閩而守
封縫掖者坐帷而論古續未周而如挾袞有關而咸補
宋呂大鈞天下爲一家賦曰古之所謂天下爲一家
者盡日月所照以度地極舟車所至以畫疆以八荒之
際爲藩衛以九州之限爲垣墻列國則羣子之舍王畿
則主人之堂凡民之賢而不可遠者皆我之父兄保傅
愚而不可棄者皆我之幼稚獲臧經理其財乃上所以

養下之道分責之事乃下所以事上之常留遷有無而不知彼我之實損益上下而不辨公私之藏大矣哉外無異人旁無四鄰無寇賊可禦無閭里可親一人之生喜如似續之慶一人之死哀若功總之倫一人作非不可不媿亦我族之醜一人失所不可不閔亦吾家之貧尊賢下不肖則父教之義嘉善矜不能則母鞠之仁朝覲會同則幼者之定省承稟巡守聘問則長者之教督撫存曲防遏糴以幸其災縱謀用間以乘其失乖睽有甚於閹牆鬪狼不離於同室迨至秦政以強自吞推所不愛以殘自昏斧斤親刃其九族塗炭自隳其一門興

阡陌而廢井田則委貨財於盜賊之手置郡縣而罷封建則託婦子於羈旅之屯貧富不均幾臣僕其昆弟苟簡不省皆土苴其子孫自漢以來終亦不復雖有王侯而不得輒預其政雖有守令而不得久安其祿譬之錦衣玉食縱無所用之子雕車良馬委不善御之僕門庭雖存亦何足以統制閨門無法則何緣而雍睦豪強日橫而略無鞭撻之制單弱日困而不識襁褓之鞠豈天理之固然實人謀之不足必司馬光交趾獻奇獸賦曰皇帝御天下三十有六載化洽於人德通於神邇無不協遠無不臻粵有交趾來獻麒麟於是羣公卿士百僚

庶尹儼然垂紳薦笏旅進而稱曰陛下功冠邃古化侔儀極共承神祇嚴奉宗稷純孝烝烝小心翼翼出入起居不忘於訓典進退周旋必咨於軌則體文王之卑服遵大禹之菲食宮室觀臺無礲刻之華輿馬器用無珠玉之飾遊必備於法駕燕不廢於朝夕此皆帝王所不能為陛下行之尚不忘於怵惕是以方內乂寧黎民滋殖垂髫之童耳皆習於詩禮戴白之叟目不睹夫金革至於根著浮流跂行喙息無不翔舞太和涵濡茂澤此殊俗所以響臻靈獸所以來格雖漢室之初黑鵬貢於絕徼周家之隆白雉通於重譯殆不足方也臣等謂宜

命協律播之聲歌詔太史編之簡策以發揮不世之洪休張大無倫之不績不亦偉乎皇帝乃穆然深思愀然不怡曰吾聞古聖人之治天下也正心以爲本脩身以爲基閨門睦而四海率服朝衆和而羣生悅隨故務其近不務其遠急其大不急其微今邦雖康未能復漢唐之宇俗雖阜未能追堯舜之時况物尚疵癘而民猶怨咨朕何敢以未治而忘亂未安而忘危享四方之獻當三靈之釐皇帝於是御棫樸之篇觀大畜之繇延黃髮之儒顯巖穴之秀善有可旌無聞於幽遠言有可采不棄於微陋位匪德而不升官無能而不授使稷契居左

泉夔立右伊呂在前周召侍後相與講經藝之淵原覽
皇王之步驟求大化之所未孚訪惠澤之所未究與民
之利若療夫饑渴除民之害若憂夫疾疢賜予簡而功
無所遺刑罰清而姦無所漏浮費省而物不屈於求須
苛役蠲而農不妨於耘耨使之夏有葛而冬有裘居有
倉而行有糗絲續之饒足以養其老甘脆之餘足以慈
其幼地不加廣而百姓足賦不加多而縣官富道塗之
人恥爭而喜讓閭閻之俗棄漓而歸厚戶知禮義之方
人享期頤之壽然後旃裘之長頓顙而讐服祝髮之渠
回面而奔走靡不投利兵而襲冠帶焚僭服而請印綬

於是三光澄清萬靈敷佑風雨時若百稼豐茂休氣充
塞殊祥輻輳甘露霏霖於林薄醴泉感沸於嵌竇華平
羅植於階祀朱草叢生於庭雷鳳凰長離駢枝而結巢
黃龍騶虞羣友而為畜

詩增唐太宗幸武功慶善宮詩曰壽丘唯舊跡豐邑乃
前基粵子承累聖縣弧亦在茲弱齡逢運改提劔鬱匡
時指麾八荒定懷柔萬國夸梯山咸入款駕海亦來思
單于陪武帳日逐衛文螭端宸朝四嶽無為任百司霜
節明秋景輕冰結水湄芸黃遍原隰禾穎積京坻共樂
還鄉宴歡此大風詩又執契靜三邊詩曰執契靜三

邊持衡臨萬姓玉彩輝關燭金華流日鏡無爲宇宙清
有美璇璣正皎佩星連景飄衣雲結慶戢戈榮十德昇
文輝九功煙波澄舊碧塵火息前紅霜野韜蓮劔關城
罷月弓錢綴榆天合新城柳塞空花消蔥嶺雪穀盡流
沙霧秋駕轉兢懷春冰彌軫慮書絕龍庭羽烽休鳳穴
戍衣宵寢二難食盱飡三懼翦暴興先廢除凶存昔亡
圓蓋歸天壤方輿入地荒乳海池京邑雙河沼帝鄉躬
脩思勵已撫俗媿時康元首佇鹽梅股肱唯輔弼羽賢
控嶺四翼聖襄城七澆俗庶反淳替文聊就質已知隆
至道共歡區宇一許敬宗奉和執契靜三邊詩曰元

塞隔陰戎朱光分昧谷地遊窮北際雲崖盡西陸星次
絕軒臺風衢乖禹服寰區無所外天覆今咸育竄苗猶
有孽戮負自貽辜網疎妖鮪漏盤藪怪禽逋鬣飛尚假
息乳視暫稽誅乾靈振玉弩神略運璇樞日扇廓遊氛
天陳清華野昇暄光西夜馳恩溢東瀉揮袂盡崑炎開
關納流赭錦輶凌右地華纓羈大夏清臺映羅葉元汴
控瑤池駮鹿輸珍貺樹羽響來儀輟餽觀化雨栖籞萃
條支薰風交闐闕就日泛濛漪克庭延飲至絢簡敷春
藻迎姜已創圖命力方論道昔託遊河乘再備商山皓
欣逢德化流思效登封草蘇味道奉和受圖溫洛詩

曰綠綺膺河檢青壇俯洛濱天旋俄制蹕孝享屬嚴禋
陟配光三祖懷柔泊百神霧開中道日雪斂屬車塵預
奉咸英奏長歌億萬春牛鳳及奉和受圖溫洛詩曰
八神承玉輦六羽警瑤溪戒道伊川北通津澗水西御
圖開洛匱刻石與天齊瑞日波中上仙禽霧裏低微臣
矯弱翮抃舞接鸞鷲西陳子昂皇帝上禮撫事述懷詩
曰大君忘自我應運居紫宸揖讓期明辟謳歌且順人
軒宮帝圖盛皇極禮容申南面朝萬國東堂會百神雲
陛旗常滿天庭玉帛陳鐘石和睿思雷雨被深仁承平
信娛樂王業本艱辛願罷瑤池宴來觀農扈春卑宮昭

夏德尊老睦堯親微臣敢拜手歌舞頌惟新李嶠皇
帝上禮撫事述懷詩曰配極輝光遠承天顧託隆負圖
濟多難脫履歸成功聖道昭永錫邕言讓在躬還推萬
方重咸仰四門聰恭已忘自逸因人體至公垂旒滄海
晏解網法星空雲散天五色春來日再中稱觴合纓弁
率舞應絲桐凱樂深居鎬傳歌盛飲豐小臣濫簪筆無
以頌唐風空又奉和拜洛應制詩曰七萃鸞輿動千年
瑞檢開文如龜負出圖似鳳銜來殷薦三神享明禋萬
國陪周旗黃鳥集漢幄紫雲迴日暮鈎陳轉清歌並帝
臺禁盧綸皇帝聖感詞四首曰提劍雲雷動垂衣日月

明禁花呈瑞色國老見星精發棹魚先躍窺巢鳥不驚
山呼一萬歲直入九重城雲天衣五鳳彩御馬六龍文
雨露清馳道風雷翊止軍高旌花外轉行漏樂前聞時
見金鞭舉空中指瑞雲妙算干戈止神謀宇宙清兩
階文物盛七德武功成校獵長楊苑屯軍細柳營歸來
獻明主歌舞溢春城天天樂不天中雲屏儼在空鉛黃
豔河漢笑語合笙鏞已見長隨鳳仍聞不射熊君王親
試舞閭闔靜無風也楊巨源春日奉獻皇壽無疆詞十
首曰文物京華盛謳謠國步康瑶池供壽酒銀漢灑宸
章靈雨含雙闕雷霆肅萬方代推仙祚遠春共聖恩長

鳳宸臨花暖龍鑪旁日香遙知千萬歲天意奉君王
鴛鴦彤庭際軒車綺陌前九城多好樂萬井半祥煙人
醉逢堯酒鶯啼答舜絃花明御溝水香暖禁城天賜宴
文逾盛徵歡物更妍無窮豔陽月長奉太平年正雲陛
臨黃道天門在碧虛大明含睿藻元氣抱宸居戈偃征
苗後詩傳宴鎬初年華富仙苑時哲滿公車化入網緼
大恩垂渙汗餘悠然萬方靜風俗揖華胥玉漏飄青
璣金鋪麗紫宸雲山九門曙天地一家春瑞靄方呈賞
暄風本配仁巖廊開鳳翼水殿壓鰲身文雅逢明主歡
娛及賤臣年年未央闕恩共物華新垂拱乾坤正歡

心品類同紫煙含北極元澤付東風珠綴留晴景金莖
直曉空發生資盛德交泰讓全功間氣登三事祥光啓
四聰遐荒似用水天外一朝宗代是文明晝春當宴
喜時鑪煙添柳重宮漏出花遲漢典方寬律周官正採
詩碧霄傳鳳吹紅旭在龍旗造化膺神契陽和沃聖思
無因隨百獸率舞奉丹墀睿德符元化芳情翊太和
日輪皇鑒遠天仗聖朝多曙色含金榜晴光轉玉珂中
宮陳廣樂元老進賡歌蓮葉看龜上桐花識鳳過小臣
空擊壤滄海是恩波物象朝高殿簪裾溢上京春當
九衢好天向萬方明樂報簫韶發杯看沆瀣生芙蓉丹

闕暖楊柳玉樓晴闔闔開中禁衣裳儼太清南山同聖
壽長對鳳凰城日上蒼龍闕香含紫禁林晴光五雲
疊春色九重深賞叶元和德文垂雅頌音景雲隨御輦
顯氣在宸襟永保無疆壽長懷不戰心聖朝多慶賜瓊
樹粉墻陰化洽生成遂功宣動植知瑞凝三秀草春
入萬年枝鳳掖嘉言進鴛行佳氣隨仗臨丹地近衣對
碧山垂渥澤方柔遠聰明本聽卑願同東觀士長對漢
威儀杜甫行次昭陵詩曰舊俗疲庸主羣雄問獨夫
讖歸龍鳳質威定虎狼都天屬尊堯典神功協禹謨風
雲隨絕足日月繼高衢文物多師古朝廷半老儒直詞

寧戮辱賢路不崎嶇往者災猶降蒼生喘未蘇指揮安
率土盪滌撫洪鑪壯士悲陵邑幽人拜鼎湖玉衣晨自
舉鐵馬汗常趨松柏瞻虛殿塵沙立暝途寂寥開國日
流恨滿山隅又重經昭陵詩曰草昧英雄起謳歌曆
數歸風塵三尺劔社稷一戎衣翼亮貞文德丕承戢武
威聖圖天廣大宗祀日光輝陵寢盤空曲熊羆守翠微
再窺松柏路還見五雲飛薛逢宣政殿前陪位觀冊
憲宗皇帝尊號詩曰樓頭鐘鼓遞相催曙色當衙曉仗
開孔雀扇分香案出袞龍衣動寶函來金泥照耀傳中
旨玉節從容引上台盛禮永尊徽號畢聖慈南面不勝

哀 陳陶皇帝擊壤歌詩曰百六承堯緒艱難土運昌
太虛橫慧宇中野鬪豺狼帝曰更吾嗣時哉憶聖唐英
星垂將校神嶽誕忠良鍊石醫元氣屠鼈正昊蒼埽原
鋪一德驅禘立三光大道重蘇息真風再發揚芟夸踰
舊跡神聖掩前王郊酒酣寥廓鴻恩受渺茫地圖龜負
出天誥鳳銜將雜貢來山峙羣夸入雁行紫泥搜海岱
鴻筆富巖廊鷹象敷宸極寰瀛作瑞坊泥丸封八表金
鏡照中央構殿符麟趾開藩表鳳翔鸞輿親稼穡朱幌
務蠶桑戎羯輸天馬靈仙侍玉房宮儀水蒐甲門衛綠
沈槍陶鑄超三古車書混萬方時巡望虞舜蒐狩法殷

湯化合謳謠滿年豐鬼蜮藏政源歸牧馬公法付神羊
寶鼎無靈應金甌肯破傷封山昭茂績祠法答嘉祥在
昔宮闈僭仍罹羿浞殃牝雞何譏譎豺犬漫劬勦苗禱
三靈怒桓偷九族亡鯨鯢尋挂網魑魅旋投荒松柏霜
逾翠芝蘭露更香聖謨流祚遠仙系發源長島嶼征徭
薄漪瀾汎稻涼鳧魚饜餐啖荷薛足衣裳寤寐華胥國
嬉遊太素鄉鷹鷂飛接翼忠孝住連墻有叟能調鼎無
媒隱釣璜乾坤資識量江海入文章野鶴思蓬闕山麋
憶廟堂泥沙空淬礪星斗屢低昂歷草何因見衢樽豈
暫忘終隨嘉橘賦霄漢謁羲皇李百藥謁漢廟詩曰

纂堯靈命啓滅楚閩餘終飛名膺帝錄汎迹韞神功瑞
氣朝浮碣祥符夜告豐抑揚駕人傑咤叱掩時雄締構
三靈改經綸五緯同干戈革宇內聲教盡寰中運謝年
逾遠魂歸道未窮樹碑留故邑抗殿表祠宮沐蘭祈泗
上謁帝動深衷英威宿如在文物杳成空竹皮聚寒徑
粉社落霜叢蕭索陰雲晚長川起大風左劉希夷謁漢
世祖廟詩曰春陵氣初發漸臺首未傳列營百萬衆持
國十八年運開朱旗後道合赤符先宛城劔鳴匣昆陽
鏘應弦獷獸血塗地巨人聲沸天長驅過北趙短兵出
南燕太守迎門外玉郎死道邊昇壇九成陌端拱千秋

田朝廷方雀躍劒佩幾聯翩至德刑四海神儀翳九泉
宗子行舊邑恭聞清廟篇君容穆而聖臣像儼猶賢攢
木承危柱疎蘿挂朽椽祠庭巢鳥啄祭器網蟲緣懷古
江山在惟新曆數遷空餘今夜月常似舊時懸
宋尹
洙皇雅十首曰天監下民亂靡有定甚武且仁祚厥真
聖仁實懷徠武以執競匪虔匪劉拯我大命自昔外禪
月經日營令以挾制政以陰傾帝初治兵志勤於征奄
受神器匪謀而成淮潞弗虔卒汚叛迹戎輅戒嚴皇威
有赫彼寇誑民吾勇其百殄厥渠魁貸其反側帝朝法
宮左右宗公伎夫悍士以雍以容爾居爾室爾工爾農

既息既養惟天子功
主用西師岷梁弗賓匪曰負固
實交晉人予訓予誓合我將臣正厥有罪無庸傷民矯
矯虎士載摧其壁吁嗟孟侯亦果其策迎師而降靡抗
鋒鏑豈獨身謀完是宗國蜀都既平將臣失律此衆悍
驕彼民危慄當塗叫咷合萬為一匪懷則威帝心是恤
帝曰將臣予嘉乃庸廢命毒民爾弗有終邦典用疑惟
罪惟功靡殛而削協於厥中帝曰孟侯受封於楚淑旂
琯戈備物異數俾爾族姻及乃文武服乃王庭靡不有
序蜀民歌呼天子威靈保我者封暴我者刑匪功是和
匪弱是陵天子惠民誰敢不承
者武定功時惟二方

淮服其義南海遂荒孰孱而盤孰暴而猖自底不諛乃
終滅亡帝戒二俘同即爾誅惟民無辜休息是圖時其
輯矣寧威獨夫帝嗟汙邦久罹於兵或暴下以征或敷
虐以刑予命中典協於國經民服德音室家以寧帝
懷永圖治古是憲四方守臣惟屏惟翰在昔艱難弗惠
訓典跨都連城高牙以建有土有民肆乃征繕以息以
容終焉叛換凡今帥臣徂厥聞見匪革亂原曷清多難
帝告庶邦式是典彝元侯顯父戚臣宗支正乃封圻予
一人是毗凡曰附城罔爾俾之畜兵厚賦靡爾得私毋
凶而國作福作威天子有命疇敢不祗子孫承承唯萬

世規冀州之疆粵惟大鹵俗伎而專地扼而固協比
幽都蕩搖邊圉三垂旣夸兇威弗沮帝御六師百萬貔
虎翦其附庸至於城下鋒鏑始交梯衝如舞蠢爾孱王
請附降虜我士奮揚願究吾武皇帝曰吁念彼黎庶匪
鯨匪鯢復爲王士晉郊旣平九區以寧陳功太廟告假
威靈在昔武王於商觀兵惟我藝祖亦勤於征匪貸晉
罪俟作貫盈聖作聖繼巍巍相承皇矣二后功莫與京
帝籍於郊典儀具陳務農以訓供祀以勤祀在於誠
匪勤於人訓農以實匪訓以文帝謹二物乃躬乃親公
侯卿士暨厥庶民千甸有制飭哉惟寅帝賚高年式宴

洪金卷之四十一
且喜種種黃髮族丘而議我生艱難暴亂以繼耳徂金
鼓目狎戎器皇其我圖新講農事有子有孫力田孝悌
鼓舞至仁薰焉如醉刺帝咨庶工疇其輔子俊又以登
厥勞乃圖匪忘舊勲匪賢勿俞魏魏袞台盛德以居任
賢伊何昌言是庸勉告爾猷罔恤迺躬豈無猥辭悌逆
於衷予不爾疵爾無面從始時從官戎容揚揚今帝左
右儒冠煌煌朝廷以尊文物典章得人之盛奕世重光
帝制萬邦罔有弗賓蠻夸戎狄羈而勿臣威格三方
稽顙獻珍單于革心願交使人帝謀公卿列侯庶校咸
曰彼心暴戾陰狡既擾我疆復利吾寶無若勵兵襲其

還道皇曰有衆予實念茲戰無必勝矧其歸師借曰大
獲疇能盡之益俾餘醜毒無朔陸乃俞其盟北州以綏
存漢世宗抗威北戎暴農算商經用弗克中土震騷漢
南始空降及後世猶稱厥功初穆聖考德無與偕匪勤
於兵北人遂來逮是三紀遠俗以懷生民休息嗚呼仁
哉帝仁於明刑在位者以寬恤爲治焉皇底其治欽
哉惟刑在疑而宥罔察爲明愛怒弗肆孰爲重輕毋一
弗辜惟典之平前世理官倚法以刻匪彼爲仇蓋曰任
職令之蔽獄務正其辟鑒於前人繫我仁德皇德在仁
寢而成風公侯卿士靡不率從麇卵萌生咸保厥終不

鄙不天樂哉融融士噫太平無象兮世烏得而知維盛
德可迹兮其封祀之儀東岱宗兮西汾睢禮上帝兮賓
地祇皇有征兮吾民以嬉皇有祈兮吾民是私天敷佑
兮惟皇之釐永世億寧兮無疆之基范仲淹堯廟詩
曰千古如天日巍巍與善功禹終平洛水舜亦致薰風
江海生靈外乾坤揖讓中鄉人不知此簫鼓謝年豐
黃庭堅神宗皇帝詩曰文思昭日月神武用雷霆制作
深垂統憂勤減夢齡孫謀開二聖永命對三靈今代誰
班馬能書汗簡青鈞築收賢輔天人與聖能輝光唐
六典度越漢中興百世神宗廟千秋永裕陵帝鄉無馬

跡空望白雲乘邵雍觀盛化詩曰紛紛五代亂離間
一旦雲開復見天草木百年新雨露車書萬里舊山川
尋常巷陌猶簪紱取次園林亦管絃人老太平春未老
鶯花無害日高眠元郝經開平新宮詩曰日月旋天
蓋星辰合斗樞光騰掌內鐵氣繞澤中蒲金帛羞重賜
弓刀奮一呼真人翔灞上天馬出余吾尺箒初開闢羣
雄競走趨無勞爲更舉乘勝即長驅蹴蹋千年雪驍騰
萬里駒長城衝忽斷弱水飲先枯肅殺威靈盛驅除運
會俱華夸塵瀆洞天地血糝糊地盡諸蕃外兵窮兩海
隅九州皆瓦礫萬國一榛蕪誰與重休息徒爲妄駭吁

治平須化日殺伐豈良圖聖子曾當璧神孫會握符鐵
山深蘊玉瀚海特生珠曆數終當在謳歌信不誣欲成
仁義俗先定帝王都畿甸臨中國河山擁奧區燕雲雄
地勢遼碣壯天衢峻嶺蟠沙磧重門限扼狐侵淫冠帶
近參錯土風殊翠擁和龍柳黃飛盛樂榆岐山鳴鸞鷲
冀野牧駒駝風入松杉勁霜涵水草腴穹廬罷遷徙甌
脫省勤劬階土遵堯典卑宮協禹謨既能避風雨何用
飾金朱棟宇雄新造城隍屹力扶建瓴增壯觀定鼎見
規模五讓登皇極羣生賜大酺還聞却走馬即見弛威
弧簡策詢前代弓旌聘老儒恢弘回一氣徼幸絕多途

雷雨施龐澤乾坤洗舊汗直為提赤子遂使出洪鑪遠
徼收疲薊窮邊罷轉輸江孺遺鄂岳石窟棄巴渝刀槊
存殘骨膏粱換毒痛却令逢有道免使叫無辜契闊還
同室鰥惻得字孤八荒皆壽域六合極歡娛白叟休垂
泣蒼生獲再蘇只知期用夏更擬論平吳旭日冰天透
仁君雪國無終能到周漢亦足致唐虞遇主得知已逢
時合舍軀弭兵通信誓奉詔敢踟躕頓覺心田豁還將
肝紙劄行行重回首瑞氣滿闔閭明宣宗章皇帝述
祖德詩曰恭惟我仁祖躬備大聖德天性稟純粹溫恭
而允塞篤志在仁義兼亦貴稼穡寶玉之所藏山川被

光澤塞維時屬邁屯畎畝之自適進退與道俱玉德懷
貞白皇天鑒昭晰寶命所繇錫篤生太祖聖配天立人
極九海內如鼎沸土壤分割折蒼生靡怙恃俛伏斃毒
螫仗劔起濠梁奉天拯焚溺再駕定東南一舉下西北
曠哉六合內腥穢悉盪滌三光復宣朗五典重脩飭
遠齊堯舜功近過湯武績遂令普天下休養樂生息
太宗削奸回維統奠宗祏聖文既炳煥神武尤赫奕賢
才盡登用秉德各脩職庶邦承覆載貢獻來九譯昭
考撫盈成至仁弘隱惻民安視如傷恭已臨萬國繼志
與述事夙夜懷兢惕皇風益清穆皇道彌正直共正本

所自隆仁祖實啓迪祥源深且廣天派肆洋溢聖神紹
傳序茂衍萬世曆造商本元王興周美后稷茲予嗣
鴻業時幾謹申飭四聖赫在天悠久貽法式保佑賴深
眷負荷媿餘力稽首陳咏歌庶用示無斁劉基聖人
出詩曰聖人出臨萬方赤若白日登扶桑陰靈韜精星
滅芒羣氛辟易歸大荒曖曖寒谷熙春陽枯根發茁暢
幽藏潛魚躍波谷鳥翔花明草暖青天長聖人壽北斗
軒轅調氣候北辰居中環列宿八方應律九歌奏圓方
交格神靈轉聖人出陽道開億萬年歌康哉又謁夏
王廟有感詩曰一片宮垣粉牘新前王陵廟在松筠玉

書金簡歸天地貝葉曇花詫鬼神滄海波濤紆職貢山
川草木望時巡苗頑未狎虞階舞空使忠良淚滿巾夏
李東陽孝宗皇帝詩曰恭已同虞帝祇台比夏王內廷
無女謁外圍絕禽荒富有天和養終期曆數長彼蒼何
弗弔民物共摧傷大聖道通三極王言似六經面開天
日表書作虎龍形杞國憂方劇華胥夢不醒萬年金匱
在遺訓炳丹青鶴髮承顏日龍樓問寢晨兩宮同奉
養九廟極精禋孝可通金石誠能動鬼神徽稱高萬代
垂憲及千春甘畝畝蒼生念閭閻白屋情覽章時旻日
露禱必深更歲旱憂疑獄天寒憫戍兵尚遺寬卹詔朝

野共吞聲極意窮幽隱虛懷仰治平近臣常造膝閣
老不呼名道合君臣義恩深父子情化機元不偶天意
竟何成玉几終宵坐彤闈徹曉通孫謀思祖訓家教
託儲宮天語丁寧際龍顏髣像中此身真隔世地下儻
相從滄海宇熙平日乾坤夢幻間虹流始華渚龍臥已
橋山堯莢驚新換湘筠憶舊斑翠華天上去無路可追
攀靈駕歸何處茂陵西更西日輪埋地軸雲路隔天
梯月迴鳴鑿靜山圍簇仗齊元宮松柏裏瞻望轉淒迷
又重謁孝陵有述詩曰龍虎諸山會車書萬國同星
躔環斗極王氣繞江東地湧神宮出橋分御水通丹爐

晨隱霧石馬夜嘶風日月無私照乾坤仰聖功十年瞻
望地雲樹鬱蔥蔥又孝宗皇帝輓歌曰北闕南都象
鎬豐我皇身自際時雍祇因龍種如高帝何止虬髯似
太宗草木有情皆長養乾坤無地不包容因思二十年
前事長躡仙班侍九重聖朝偃武脩文日共道王言
似六經宋史重施新袞鉞孔庭增飾舊籩鉶垂衣共仰
升龍象賜墨皆成翥鳳形回首茂陵松柏樹春來還向
裕陵青薛蕙候聖駕回詩曰西北收皇旅東南歸帝
京山驅八駿下海汎六龍行後車環外衛前駟集神垆
支兵連四校中堅屯九營絳氣曳朱竿青雲生翠旌饒
歌彩吹激行漏玉鸞鳴入覲萬國至清宮羣后迎金貂
雜流景圭璧委繁星錄功對五帝合符朝百靈俯窺地
紐正仰瞻天柱平郊裡方展義升封將告成祈招美王
度長謠誦休明

淵鑑類函卷四十六

洪鏡秀區卷四十六

夏身臨解朴開

臨五叶朝天卦平校野方昇壽長桂洪吉為林林美
蘇赤景圭聖委繁星輪如權正帝合林障百靈
煇深如熾行祿王鸞歌入曠萬國至青宮華



卷之四